

蒲州府志

第六冊

DS
793
S32P827
1785
V.6



冊	6
卷13-15	

蒲州府志卷之十三

忠節

敬釗蒲阪人隋仁壽中爲繁峙令有名隋漢王諒反
兵至釗力戰城陷賊將墨弼臨以兵釗不爲屈弼
義而止之執送於喬鍾葵署爲代州司馬釗正色
拒之鍾葵曰受命則可不則死釗曰吾爲縣宰逢
逆臣反叛進不能保境退不能死節爲辱已多何
乃復以僞官相迫也死生唯命他非所聞鍾葵將
殺之會楊義臣兵至乃獲免釗後終朝邑令

呂子臧蒲州人隋末爲南陽郡丞唐高祖起兵遣馬
元規慰輯山南獨子臧堅守元規使人喻意子臧
殺之及煬帝凶問至子臧發喪訖乃送款於唐高
祖以爲鄧州刺史與元規共扞朱粲粲兵攻城或
勸子臧降子臧曰我天子方伯豈降賊乎帥兵與
粲戰死之

薛愿河東汾陰人爲潁川太守本州防禦使唐天寶
末安祿山反時陳留汝南諸郡皆陷於賊賊方攻
南陽潁川當賊往來道愿與副使龐堅悉力固守

城中兵素寡至德元年賊來攻愿晝夜甚急而外
援不至攻十餘日守備皆竭賊夜半乘雲梯入愿
與堅俱被執送東都將支解之或說祿山二人義
士殺之不祥時天甚寒乃繫二人於洛水濱一夕
皆凍而死

張介然猗氏人長於計畫始爲河隴支郡太守王忠
嗣哥舒翰領節度並署爲營田支度使入奏稱旨
賜列戟故里本鄉得列戟自介然始哥舒翰薦爲
少府監歷衛尉卿河南節度採訪使時安祿山反

介然守陳留不三日祿山度河烟塵漫數十里日
爲奪色士聞鉦鼓聲皆懼不能授甲賊兵攻之凡
十六日城陷殺陳留降者萬人斬介然於軍門

猗氏志有忠烈傳首列封常清夫常清爲將死
不以罪謂唐之失刑與常清之枉可也既非見
執不撓之列復無臨陣握刃之毅以云忠烈儼
人失倫載筆之法詎云爾乎今特傳常清人物
中

李興蒲州人宋咸平中契丹入寇真宗幸大名興以

東班殿直隨節度使康保裔引兵拒敵與契丹戰
河間府軍陷保裔沒於陣興亦死之

南仲猗氏人金興定六年以武節郎破羣盜有功遷
懷遠將軍佩金虎符判河中府事元兵取河中仲
引兵出戰身先士卒死之

黃連萬泉人少有志節明正德中自湖州府檢校陞
泰興縣主簿值流賊犯境連率民兵及家衆禦之
引弓射賊賊死者數人賊怒急擊連連與鬪而死
事聞贈泰興尹立祠祀焉

萬泉縣志云連爲大興尹賊犯縣境連帥衆禦賊死之大興京縣也明正德中賊劉六劉七起畿南自通涿霸州文安河間諸郡縣多被殘掠然未常及大興其後官軍討賊賊敗南竄轉至徐淮間因犯泰興是時連適爲縣簿因出捍賊遂戰死事聞卽贈其縣知縣夫泰興爲今南通州屬邑非大興也特主簿無討賊之責連慷慨赴之竟以戰死可謂壯矣

李軌萬泉人初爲諸生母死廬墓側正德中官江西

南康府照磨時江右盜起攻南康城陷自知府以下皆遁去唯軌不去坐官署中賊入與其子俱爲所殺

姚昌祚臨晉人天啟丁卯舉人任河南新野知縣調官泌陽時張獻忠蹂河南與羅汝才合兵攻下信陽遂趨泌陽一夜馳二百里至城下昌祚有勇力素習武技聞賊猝至方計守堞而賊已突入昌祚持矛出與賊戰刺殺十餘人身亦重傷仆地獻忠縛致之勸使降已昌祚怒罵賊遂爲獻忠所殺其

子在紳姪在鈞偕死焉後贈昌祚河南按察司僉事蔭其一子

馮守禮猗氏人明末以舉人知山東萊蕪縣時大兵掠及山東將至萊蕪或勸守禮以家口出城爲避守禮曰如遣家口出則人無固志城何以守不聽及清師至圍攻之五日而城破守禮在城上謂其二子曰父子致命同在今日必戰而死勿降辱吾家也遂力戰身被數矢知不能敵乃引刀自殺二子亦自殺惟少子掄奇存焉兵退扶喪歸葬巡

按御史爲之請得蔭卹云

王震仲猗氏人明末以武科官真定府遊擊以援易
州有功擢副總兵屯河間有任國奇者叛將也踞
河間泊頭鎮震仲勦之夜抵國奇營國奇出倉猝
營中大亂自相踐會天明瞰知震仲兵少遂合衆
圍之震仲不能出與賊戰自辰及酉力竭死於陣
景淑範蒲州人以舉人知山東莒州值明末兵亂莒
城破淑範死之

韓承宣蒲州人大學士曠孫明末以進士知山東歷

城縣 大兵至攻破歷城承宣死之贈光祿少卿
有子世琦 國朝入旗籍官至巡撫

相希尹明末以武進士歷官甘肅副總兵家居值李
自成陷蒲州爲所執大罵不屈與州人參將張夢
鯉並爲賊所殺

樊邦正蒲州人明末以舉人官湖廣德安府知府張
獻忠攻德安邦正悉力守禦後里居值李自成至
攻蒲州破邦正不屈而死州人稱邦正及相希尹
張夢鯉爲三忠

王應寵者蒲州韓氏之僕也有妻妾各一家頗殷應寵所事韓于宣常官知府時方家居明崇禎十七年正月賊李自成至蒲蒲人多迎降者賊執蒲縉紳責金餽軍于宣驚懼與其妻薛皆自死應寵俟于宣殮訖謂妻妾曰我與爾皆明民義不可降賊當相偕死遂置三繩堂上而取片木自書曰大明小民王應寵之靈引杯酒與妻酬勸因令就縊已而妻縊妾從之應寵乃以繩自經明日賊入其室見三屍陳焉睹所書木皆大驚以告賊將賊將使

其屬殮之太息以去于是州人稱應寵爲義民其後數年有翟鳳翥者傳其事

嗚呼寵之死偉矣自稱明民不肯辱賊其見義明而蹈節勇有古烈士之風哉非然何以甘于自決而慷慨若斯耶跡其身居僮僕之賤非如縉紳先生素常聞教而服訓以彼其身可以無死然且抱志抗節卒從而死焉其視士大夫之媮冒苟活幸自安全者賢不肖相去何如哉以寵之義而州之舊志未嘗一爲述焉非鳳翥傳

之其事將就泯歿豈以其微而畧之歟夫仁義
何常背之則爲小人蹈之則爲君子古人蓋極
言之安得拘乎其類而致掩夫斯人之行耶予
於忠烈一篇特傳寵以揚其旨亦春秋之意也
忠節補

韓胤勲蒲州人明崇禎三年以副千戶調征流賊遇
之于太平縣史村自辰至酉轉戰數十里斬賊魁
三人會日暮賊至益衆胤勲力盡被執令之降不
屈遂爲賊所殺首隕而軀不仆作奮躍狀者再事

聞贈安遠將軍太平人立廟祀焉

賈道醇永濟貢士順治中爲太谷教諭攝其縣事時
姜瓖反於大同太谷爲賊黨所陷道醇死於亂贈
國子監助教祀之太原忠烈廟中

孝友

皇甫奴河東人北魏景明初郡人楊諷等七百五十人上章列稱皇甫奴兄弟雖沈屈兵伍而操尚並高奉養繼母甚著恭孝之美於是畿內大使王凝請加表異詔從之

令狐仕猗氏人兄弟四人早喪父奉侍其母孝著鄉邑大使王凝奏加標表焉

荆可猗氏人性質朴苦身勤力供養其母母死水漿不入口三日絕而復蘇者數四晝夜哭泣負土成

墳可墓去家十餘里廬於墓側哀感遠近大統中鄉人上言其狀周文帝令州縣加之表異比服終尚如居喪周大冢宰晉公宇文護聞其孝行特引見焉及可卒收其妻子於京城給以衣食

皇甫遐河東汾陰人性純至少喪父事母以孝聞後遭母喪廬於墓側負土成墳積歲墳高數丈周五十餘步食粥枕土形容憔悴遠近聞其至行並以米粟遺之郡縣表上其狀詔加旌異

姚棲雲河中永樂人唐貞元中調卒戍邊棲雲父語

其兄曰兄嗣未立宜勿往弟幸有子請代兄行至塞上遂戰歿時棲雲方三歲其母他適伯母撫養之既長事伯母如母又招魂葬其父廬於墓左哀慕不衰縣令蘇輒以俸錢買地開阡刻石而表之河中尹渾瑊上其事詔加優賜表其門名其鄉曰孝悌里曰節義社曰愛敬

盧操河東人幼好學事繼母張至孝張溺愛已生三子而命操主炊供食操執勞不倦張遣子就學讀書操爲之執鞭策驢三子並不肖醉酒忤人人登

門詬辱及張操泣拜以解人曰不忍以三賤累長者相與謝操而去後擢明經爲臨津尉佐政寬仁每旦必具冠帶誦孝經一篇然後視事

唐書孝行傳有蒲州賈孝才虞鄉董敬直河東張金城呂神通等皆以割股旌門閭賜粟帛復賦稅云

姚宗明棲雲十世孫也宋慶歷中有司以姚氏十世同居聞於朝仁宗詔復其家自宗明至其孫德又三世五十餘年而其家孝睦不替姚氏世爲農有

田數十頃聚族百餘人躬事田桑歷唐末五代至宋而子孫保守墳墓不相離散天下未有也

樊珪河中府人元至大間爲大都提舉母喪明珪聞之卽日棄官歸以舌舐母目七日而復明有司以聞詔旌其門曰孝感

王庭祥猗氏人事親甚謹父病疽久不愈庭祥以口吮其膿遂獲愈母目失明日以舌舐之未幾母目亦愈事聞被旌

杜昭河中府人襁褓中失母其繼母吳撫之甚厚及

長事吳甚孝吳卒廬墓三年朝夕哭泣曰吾報之不能盡也

王寵萬泉諸生也母歿廬其墓側朝夕哭如初喪時有鳥巢於廬左桑樹抱卵人以爲孝感所致

王約猗氏人父早亡母有夙疾不能動履約朝夕扶奉二十餘年母亡廬於墓側不飲酒食肉者三歲一日於廬次晝卧夢人呼之曰起起水至矣約驚覺俄而水果大至約有備得免正統二年旌爲孝子云

王良卿猗氏人性篤孝友初其兄以疑獄將置辟不得脫良卿方貢入太學每朝夕焚香祝天同舍生見而恠之叩所以初不肯答久之知爲兄故也明年同舍者成進士出爲山西巡按御史感良卿友愛之誼竟釋其兄焉

曹亂祥猗氏諸生父病痺二十餘年亂祥朝夕扶奉無一日少怠值地震亂祥亟入室欲抱父出父忽於室內躍出庭中其痺遂愈至九十餘乃卒人謂亂祥之誠實感鬼神矣

景濤蒲州人與兄瀾友愛甚至常同出遇盜於路將殺之濤向之叩頭請殺已而免其兄兄亦請殺已而貰其弟盜感其義遂俱釋焉濤後成正德辛巳進士官御史終府丞以清諒知名

王光宇臨晉人舉嘉靖乙未進士性至孝母目盲光宇虔禱於神盲復愈常官西邊有劉驛丞者去官貧甚將賣女爲妓券已成光宇聞之曰丞雖微官然女何可爲妓乎卽出金贖還之光宇後官至僉事在蘭州有禦虜功獎勵賜金

溫錫蒲州人成化間貢士也性至孝居喪哀毀屢致
異應事聞於朝詔旌其門

張輅者蒲州人明正德中兄鑑以事觸中人劉瑾瑾
怒令郡官收鑑將坐重辟輅詣府自言罪實由已
無與鑑也力祈代鑑死太守義而免之

耿顯世猗氏人兄弟四人同居無間言隆慶中以貢
知合水縣俸入悉分諸弟秩滿徒步而歸教授力
田以自給人皆稱其賢

陳志剛猗氏人自其先世至剛子淮七世同居炊釜

大容石餘人稱大鍋陳氏今金尚存其家

謝奇齡蒲州人侍母疾衣不解帶居喪廬墓有黃雀入墳之異

趙釗蒲州人性孝友母病祈天求代已而母愈其兄病痴其弟病瞽凡父母生養死葬皆釗爲之

洪尚仁蒲州人幼孤事其母甚篤母病呼天求代及母卒年已九十六尚仁哀毀尤至其兄遺姪五人皆撫之成立爲授室而分財焉時有臨晉人李源其行事畧與尚仁同

李奈猗氏人父彥和病篤思得肉食貧不能致乃割其股肉爲羹進之而疾遂瘳時蒲人以割股聞者又有臨晉樊九敖奈同縣張朝紀

成思忠榮河人自高祖以來七世同居人無間言稱義讓之門有碑存焉

杜麟萬泉人七歲母亡及長撫繼母弟甚厚父卒廬墓三年後官邵陽丞以廉聞而萬泉人高舉者少而孤奉母甚孝既以諸生貢入京師不得歸旦夕思其母遂病卒也

劉養德臨晉人事母以孝稱明末歲祲負母逃荒河
南遇流賊將殺之揮刃而折賊方愕及問知其孝
乃捨之反遺以金而去

張志奇猗氏人順治己丑大同總兵姜瓖反蒲人有
應賊者兵將入城志奇父母皆久卧病不能行有
伯父母亦衰老志奇以次皆潛負出郭以避賊其
後四人者皆歿貧不能葬爲人賃傭積數歲得傭
錢以舉四喪

韓啟芳臨晉人常鬻子以葬其父父喪三年不入卧

內其母危疾禱於神七日夜至於流血夢神與之藥旦日如其方進之果愈後其母卒毀疾幾殆復全啟芳邑人郭復蘇亦有孝行親疾爲嘗糞卜親之生死及歿哀哭喪明官旌之

賈允重萬泉諸生母歿父再娶妻其繼母待允重不以禮常酷使之允重不少怨常爲人言已不能事母母實愛已也後繼母知其孝亦感動泣下自是遂善遇之康熙十七年建坊以旌其行

楊奉時滎河人母早亡其繼母荆無子卧病二十餘

年奉時與其妻侍養勿怠初奉時兄已分居矣既而兄卒奉時念嫂與姪無所依復迎之合炊比姪長而爲授室又承父志以父所自致貲分給其父兄弟之子曰是皆吾先人之所撫而長也於是鄉里並高其誼乾隆十八年共言於上官而以孝義旌焉

州舊志平陽府志山西通志蒲州孝子有董永而以爲萬泉人夫永初不見於史若予觀他郡縣地志諸書亦多列永名與其墓則永果不必

萬泉人而向之所傳未足據以爲信也至於天
帝使織女下爲永婦是又委巷之野談裨乘惑
人義所不取而通志以下具載勿削何也

孝之爲德也豈易言哉必極其至雖賢人君子
有所不能盡夫豈尋常一事一節所得遽冒其
名乎雖然曾參子騫既不可見於世必持此以
責天下亦非導民佑俗之方也夫春秋之義善
善欲長而以行示人期其共勸故自舊史所傳
以外錄樊珪而下訖楊奉時凡二十三人始乎

元時至今世止列其行事可觀者爲孝德傳以
諷厲郡人使有所感而興焉

孝友續

溫錫明蒲州貢士有孝行親歿負土成墳居於墓側
致野蠶成繭與白蛇之祥又張聖謨亦貢士蒲人
聖謨父圻事親最孝終身思慕屢表於官聖謨復
孝其至行有過人者當選縣丞未仕卒

高丕茂萬泉人世農家至丕茂學儒爲貢士丕茂性
孝常讀書山中聞父有疾中夜奔歸不顧險阻侍

左右衣帶不解及父死母復失明丕茂事之曲體其志母雖盲瞶而意爲之安常有盜數人夜入母室丕茂恐傷其母力與鬪乃去母亡哀毀如喪父時雍正元年鄉人以孝行舉丕茂於官獲旌萬泉復有生員黃元鰲貢生李楫並號能事親於父母卒繪像奉之數十年慕思不忘

李世昌臨晉諸生也國初時隨父避亂爲賊兵所擄將殺其父世昌叩頭出血請以身代死賊憐其孝乃釋其父且以金遺之使歸

楊常謙臨晉人少爲諸生父病痺手足不能運日卧牀第几欲坐起皆常謙抱扶之不離父側者十六年夜未嘗就私室父歿二十載而常謙卒卒時猶念父云其同縣有荆明性者行彷彿常謙又有謝詵者父病禱於神願以已代已而父愈

榮河孫希升其母早寡希升善事之國初時避亂棄妻子獨負母以行及母死廬墓側三載希升又常還遺金掩暴骨他端皆可稱

趙世隆永濟人事繼母以孝聞世隆生明天啟中卒

康熙己巳爲人性恬靜居永樂鎮或數年不入城
府以教授爲事鄉里多敬之自世隆外以廬墓稱
者永濟有李斗星姚廷珍李大智李大順楊積猷
以割股稱者榮河有樊鶴算斗星廷珍並已旌而
在雍正中以孝行例旌者有楊生滋薛英賢衛大
訓大訓臨晉人生滋英賢並永濟人永濟李文濂
亦以乾隆九年旌其未表者民李大有貢士楊若
秉並臨晉人與生滋等皆郡人所爲孝子者也永
濟侯法侯式楊錦春兄弟相愛久能不衰而諸生

王坦居臨晉其家合炊者亦數世焉

王焯臨晉人康熙中以進士知湖口縣有徐元長夏
廷資者以枉論死焯至爲理出之官湖口六年卒
與其弟甚親睦病亟時尚呼其弟以不見爲憾而
其弟是日家居方會客忽涕淚悲愴不能自禁衆
皆恠之後月餘焯凶問至蓋其友愛篤切精神相
感如此

胡拱微虞鄉人十一喪母送母葬號泣不肯歸其父
强攜以返拱微日涕泣往墓所百餘日方止後值

水發將及墓拱微卧守墓下水至不動人皆異焉
父瘍作於股時時悶絕拱微吮之血出乃漸差同
縣有樊作知者本農人奉後母以孝稱人有種瓜
者蔓至其田中因熟焉作知告其人使取之人曰
瓜生若田所若取可矣竟不取於其主歸焉又永
濟張恂數歲生母死既長以不及事疏衣菲食終
身

張所聚臨晉人善事繼母母無子且病久卧牀第間
穢溺狼藉見者多憎避所聚日躬侍未常厭怠比

母卒居喪哭泣無替禮焉

胡養熊臨晉人性素孝其父嗜魚養熊他日之榮河
爲求魚忽心動急歸則其父疾作待養熊來意殊
迫已而至父喜遂瘳常爲母煮藥酒酒傾激火傷
目恐爲母知不敢言於前怡笑以承懽色若無患
者壽八十終

吏師

蔡瑄榮河人洪武初以學行貢於朝授儀禮司序班
累官至通政使凡章疏乖謬者卽糾正之百僚肅
然以病乞歸卒於路太祖悼惜焉自爲文以祭復
其家三年

陳榮祖臨晉人洪武庚午舉人連任富平洛南濟源
知縣守正不阿居官有留犢之風爲吏民畏服

薛魯蒲州人建文己卯舉人官給事中嘗三奉使往
占城交趾儀觀雄偉議論慷慨後卒於交趾勅使

迎其喪歸葬

張福蒲州人永樂庚子舉人任山東平度州知州律已廉介鋤強扶弱稱時循吏擢大名知府卒於官平度民立祠報功春秋祀之

衛述蒲州人景泰庚午舉人知山東武定州剛直清敏拊循孤弱倍極仁慈移知莒州毀淫祠興學校在官十年既去民咸思之孟琳者與述同年官淮安同知政聲甚著初以舉人至京師時石亨曹吉祥方持權欲致琳門下堅謝不往而與琳同州謝

廷桂者景泰癸酉解元同知常州府治行稱江左
第一終河間府知府

王瓚萬泉人成化甲午舉人知山東即墨縣廉潔正
直事至立決在官七年卒幾無以殮時美其清介
且惜其才云

史魯蒲州人正德戊辰進士初任鎮江推官爲政嚴
明平反冤獄有懷金來謁者峻却不受貴官某以
書來爲人干請裂而還之擢刑科給事中屢上章
劾大臣與守備中官之失并論寧王宸濠奸狀時

議偉之後爲錢寧所忌罷歸

姒昂蒲州人正德己卯舉人嘗三爲縣令兩任通守
所至有循良風其初任陝西韓城也吏胥多貪冒
索錢昂嚴其約束凡民有訟者絕去賕請里甲飼
馬外別無供億也其治蹟陝西志亦載之

薛侃滎河人賦性貞介起縣從事於正德中任河內
典史清苦絕人而治事甚整爲上官所服因共薦
其賢擢知山東曹縣曹有他縣糧移徵之累侃力
請豁之民皆稱慶後終隴州知州侃在官二十餘

年疏食布衣而實心經畫持法嚴毅士大夫聞而敬之

景佐蒲州人弘治庚戌進士任東安知縣有惠政遷都察院經歷以事忤劉瑾下錦衣獄旋得釋左官累遷至河南參政佐性嚴重所至能執法及罷官歸足未嘗一造縣庭也

羅鳳翽蒲州人嘉靖丙午舉人自國子博士歷官至寧夏巡撫鳳翽爲政不嚴而威其在寧夏設防禦綏士民西邊賴以安堵者十年

衛鈞臨晉人嘉靖己酉舉人知任縣潔己愛民卒於
官吏民皆相弔哭鈞兄鈿弟鑄並以舉人仕州縣
有績可紀云

張問明猗氏人嘉靖壬戌進士任光山知縣光山故
盜藪問明至以方畧除之入爲御史數言事著風
力時方遣繡衣出按川湖雲貴憲府以問明名上
世宗見之曰西南萬里須得此人使歸復按三吳
持法鋤強恃勢凌百姓者皆懾服與政府不合改
官曹郎出知河間府以疾歸

王謙嘉靖甲子舉人繼登進士官工部郎出知杭州
權事時浙兵以乏餉大譁巡撫不能馭因走匿衆
益沟沟謙知狀即身前諭之爲開曉利害曰汝無
訐吾當發權金代與汝餉衆乃定杭人尤德之

荊州土臨晉人萬歷丁丑進士知山東臨朐縣臨朐
地瘠民多貧苦兼值凶荒州土至捐俸立官莊具
牛種以勸民田平賦輕刑五年邑中大治後累官
巡撫河南僉都御史

孟希孔琳之孫也萬歷辛丑進士知扶風縣初下車

屏去文法曲爲綏輯招撫流亡予以牛種緩其催
科不輕鞭扑民感其德後卒於官縣人爲具殮焉
初琳子汝濬官知府汝紀官通判至希孔三世並
以清白吏稱

張煇乾猗氏人萬歷己酉舉人知長葛縣縣唯土城
煇乾以時方多寇乃爲築甕城又以餘金爲敵臺
功甫竣而賊果來薄城下煇乾率衆乘城禦之凡
六日賊知有備乃解煇乾以通判終

姚惟新臨晉人萬歷己卯舉人爲廣宗令廣宗城南

有地曰潘家窪久爲石田惟新捐金立庄召貧民
自占給以牛種爲剏屋舍不數年頓成腴沃歲收
穀數千廣宗人因號其庄曰姚官遷守深州深瀕
滹沱歲多崩齧惟新爲築堤以護城郭人歌其功
子昌籙天啟壬戌進士爲吏部郎嘗却人懷金而
杜其請昌祚惟新長子也自有傳

翟敬猗氏人弘治庚戌進士以翰林檢討左官知休
寧縣縣人有青天之謠一日民舍火將迫令署敬
衣冠祝之須臾火滅及去休寧人爲建遺愛亭累

官至太僕少卿歸囊無餘錢敬至九十六乃卒

王國瑚猗氏人萬歷壬辰進士自行人出知延安府見城中無井曰設有警急卽坐困耳乃謀穿井土人謂地多沙磧舊不宜井國瑚躬自相度地形令試穿之得甘泉二十餘處人多便之及天啟辛酉秋酋長吉能擁十萬之衆入安塞口直逼郡城攻七晝夜知不可拔乃引而去始嘆國瑚之知幾焉國瑚在延安日有守禦功後遷肅州兵備副使以病免

喬震藩猗氏人國朝順治丙戌進士任山東鉅野
縣知縣時山東有李化鯨之亂攻破數縣乘勝圍
鉅野三日夜震藩率衆守知賊欲焚城令城中門
置巨瓮貯水以待已而賊舉火衆引水禦之火滅
至夜分乘不備開門擊賊多所斬殺賊知不能破
乃退鉅野獲全

陳適度猗氏人順治壬辰進士連爲江寧邵武二府
推官清慎平允每決獄夜必焚香告天邵武人何
承福爲賊所誣幾不能白適度省其寃爲立釋之

承福以千金來謝拒不受後去官家居寒素如諸生每出布衣蹇驢見者不知其鄉先生也

荆文康猗氏人由康熙庚辰進士知山東鄒城縣下車值歲儉不俟報上官即發倉粟以貸饑貧者邑有繫獄者罪且重以千金求貰力却之既而察其枉即與平反罪者得雪鄒有磨山湖夏秋水發漲漫無際行者苦之文康爲砌石堰以殺其勢凡四十餘里由是無病涉之患在鄒七年遷曹郎以歸吏師一篇蓋舉郡之賢士大夫而書其涖官行

政之績羔羊素絲其節昭焉廬江桐鄉其愛著
焉姓氏具在大畧可覩矣予觀臨晉志言明萬
歷末歲荆養喬爲御史出按江南發宣城勢家
梅振祚之惡又劾督學使者熊廷弼受振祚賂
託杖殺諸生夫廷弼爲人廉峭強直自爲保定
節推至巡按遼左早以介潔持法知名朝廷豈
受人旨而肯妄殺諸生者至以受賂誣玷之則
當時爭凌詰訕求勝之習恐養喬所言殆非其
真而不得爲是志勿能辨徒欲抑彼以助此且

謂廷弼由是敗夫廷弼固未嘗敗暫歸聽勘旋以經畧起豈以養喬故而終身罪棄哉亦失注錯於語言矣大抵揚美者無取其夸論人者必循其質苟夸而失質奚怪飾譽多實錄少乎故予於是篇加其審慎必求事之信有可錄者而他無取焉

文學

薛稷道衡曾孫也第進士累官禮部郎中中書舍人
歷踐兩省以文辭有名景龍末爲昭文館學士睿
宗踐阼喜之遷太常少師封晉國公時鍾紹京爲
中書令稷言於上曰紹京本起小吏素無才望師
長百僚恐非朝廷具瞻之美上然之翼日遷稷黃
門侍郎後罷爲左散騎常侍更太子少保禮部尚
書以贊翊功每召入禁中恩絕羣臣唐初虞世南
褚遂良並以書法名一家後無繼者稷外祖魏徵

家多藏虞褚書稷因得取之精意仿臨遂臻其妙
世稱歐虞褚薛其畫又爲絕品焉

柳冲楚賢子少好學多所研總景龍中以左散騎常
侍修國史初太宗命諸儒撰氏族志其後門胄興
替不常冲請更修詔與魏元忠吳兢等共取功德
時望貴籍之家等而次之至先天中復詔冲與魏
知古劉子玄等討綴書乃成號姓系錄遷太子賓
客昭文館學士以老致仕

山西通志文苑傳有山憚不知其爲郭山憚也

而去其姓且山憚與祝欽明之徒雖號有儒學
本拙於文章兼以諧譚爲世所鄙故不著於篇
盧綸河中人初避安史之亂去客鄱陽代宗時數舉
進士不得元載薦其文授闡鄉尉遷監察御史稱
疾去渾瑊鎮河中辟元帥判官累遷檢校戶部郎
中韋渠牟表其才名見禁中異日上問盧綸李益
何在答曰綸從渾瑊在河中即召之會綸已卒後
憲宗詔中書舍人張仲孫訪集其遺文文宗尤愛
其詩問宰相綸文章幾何亦有子否宰相對綸四

子皆擢進士在臺閣上遣中人往其家索得詩五百篇以聞

耿漳河中河東人寶應元年進士官右拾遺工爲詩方代宗時劉長卿錢起並以詩名天下時謂之錢劉而漳與起及吉中孚韓翃苗發司空曙崔峒盧綸夏侯審李端皆齊名世稱大歷十才子

楊巨源蒲州人貞元中舉進士第初爲太常博士禮部員外郎出爲鳳翔少尹召拜國子司業年七十致仕巨源以能詩訓後進多成其藝文宗太和中

時宰以巨源交儒之長宜見優朝廷乃白以爲河中少尹不領職務而歲給之祿終其身

張涉蒲州人家世儒者初官國子博士能爲文嘗請有司日試萬言時以張萬言呼之德宗爲太子受經於涉及即位之夕召入宮訪以政事翼日詔居翰林恩禮甚厚遷散騎常侍後歸田里卒

薛逢蒲州人會昌中進士初在崔鉉幕府及鉉相引爲萬年尉歷御史尚書郎持論耿切高自標顯有薦逢才宜知制誥者時相不可乃出爲巴州刺史

後以太常少卿召還遷給事中秘書監卒有集十卷傳於世

聶夷中蒲州人咸通中進士官華陰尉詩集一卷夷中所作多傷憫時世意主諷喻其憫農一篇尤懇惻五代時馮道常誦其詩爲求治者告焉與夷中同時河中王駕亦以詩稱於晚唐駕舉進士官禮部員外有守素先生集六卷其自號也

盧知猷綸之孫簡能子也中進士宏詞科補秘書正字荆南掌書記遷右補闕出刺饒州以政最遷中

書舍人避朱玟之難不出僖宗召拜工部侍郎史館修撰累太常卿戶部尚書太子太師值劉季述之難感憤卒知猷文辭瞻麗尤工於書楷法精妙而器量渾厚世推爲長者自唐中世至五代河中世名家者稱盧氏

薛紹彭河東人紹彭以名家子能詩工書宋元祐中與蘇軾黃庭堅遊同時簡州劉涇巨濟亦有名紹彭與交而尤善米芾與芾以書畫稱相知芾常賦詩稱米薛劉或又言劉米薛紹彭書傳於南渡高

宗亦珍之

李獻能河中人其先世有爲金吾將軍者時號金吾
李家獻能與其從兄弟三人並登進士故李氏有
四桂堂獻能博覽工詩於文章尤長四六金貞祐
三年廷試第一人宏詞優等官翰林應奉文字爲
趙秉文李純甫所稱後十年出爲鄜州觀察判官
復爲應奉遷修撰正大末以鎮南節度使充河中
帥府經歷官元兵破河中獻能奔陝州與河解元
帥趙偉有郤天興二年十一月偉帥兵入陝州城

殺其行省獻能亦被害

陳賡臨晉人累官河東山西行中書省參議有才名
與元好問數以詩文相酬答及卒大同儒學教授
房祺纂錄其詩與麻革張宇段成已等八人號曰
河汾諸老詩金末時河中張琚亦有能詩名長於
五言人喜稱之因有張五字之目琚詩集名韋齋
王佐河中河東人元末隨父官南雄因亂不能歸遂
寓南海與粵東孫蕢等結社賦詩何真據廣州召
掌書記佐與蕢及趙介李德黃哲並爲真所禮稱

五先生及真歸明太祖佐乃還鄉里洪武六年徵
爲給事中太祖賜宋濂馬命侍臣和御製歌佐立
成以獻後乞骸骨歸

令狐總猗氏人幼工文與蒲阪王崇雅楊俊民爲文
章之友嘉靖乙卯舉於鄉官朝邑知縣遷知合州
致仕

楊世芳尚書博曾孫也萬歷己未進士由庶吉士累
官學士世芳少絕穎讀書能一目數行下爲文章
甚敏他及琴書諸藝並能通之天啟中爲魏忠賢

所惡奪官及莊烈帝時復召爲學士

郭廷佐蒲州人少好學性嗜吟咏與郡中縉紳先生
約爲詩社州守聞其才賢延以爲賓三請而後至
與論詩甚歡益禮廷佐廷佐亦不以州民輕爲守
屈也守贈以詩云鶴髮蕭蕭倒角巾林宗雅望絕
時倫我來空負溪山約不向仙舟訪隱淪時傳爲
雅談

張璞猗氏人天啟中拔貢生官遼東通判適經畧洪
承疇欲得能草檄者璞進自贊曰通判能爲之卽

請筆札爲書一通承疇覽之驚曰通判才若此因禮重之遷陝州未幾致仕杜門著書以終

王含光猗氏人明崇禎辛未進士仕國朝官終河南按察使含光於詩工七言近體又善繪事亦稱工於時

吳雯先本關東人其父來爲蒲州廣文因留家焉故雯爲蒲州人雯居永樂唐時置縣處也得李商隱遺僑之地而卜舍焉其間有玉澗水因李號玉溪生故雯亦自號玉澗子康熙戊午舉博學宏詞遊

京師與四方能文章知名者接山東王尚書士禎
尤極推揚之晚年築室谷口家雖日貧而讀書不
休其生平篇什甚富人爲刻焉

郭九會猗氏人舉康熙己酉山西鄉試第一官終杭
州臨安知縣九會自爲舉人既不得成進士益恣
意爲詩歌古文有集二十卷

王恭先臨晉人順治己亥進士初爲河間府推官補
江南崇明令罷歸其在崇明也悉以俸金往金陵
買書載還臨晉以故恭先家書獨多慕唐高適五

十爲詩因自號所著詩文曰慕適軒集其晚歲所爲名之老學菴集初恭先父萬基爲廣文當明天啟中是歲丁卯山西行鄉試猗氏令曹暹夢萬基爲鄉試舉首已而不驗而恭先則以丁卯生至順治辛卯舉鄉試第一令所夢不爲萬基而遠在恭先亦奇矣哉

儒林文苑前史分之爲二以長各有所專而事則異矣郡之儒林見在前世者蓋少旣以附著人物而自薛稷以下至於王佐每爲談藝者所

稱故次列焉續以令狐總訖郭九會王恭先爲
文苑傳夫文章一技於道未尊少陵言之雖然
彼其雕篇織思蘊綺含華韻憂宮商聲出金石
雲霞奪其麗珠璧揚其英作之一朝足傳千載
誠亦不朽夫豈尋常竊弄硯墨未足成乎語言
者所得分其名而假才芬以相冒哉州縣舊志
都無此篇山西通志所傳河中文苑雜糅彌甚
予是以薙其蕪矣

蒲州府志

卷之十三

三

蒲州府志卷之十四

義行

羅道琮蒲州虞鄉人慷慨尚義唐貞觀末謫嶺南其友有與道琮同謫者死於荆襄間臨歿泣曰人生有死獨委骨異土爲可悲耳道琮把其手謂曰吾若不還則已假獲歸終不令子獨留此也其後道琮被赦還鄉里取道荊州爲友人舁棺不殫千里歸其家而葬焉道琮仕至太學博士

賈宗仁明蒲州人常出遊江湖間十餘年積貲千金

他日客江州有同旅趙某者藏二十金於笥而忘之疑爲逆旅主人婦所竊索之甚急其夫不能明卽欲自殺宗仁諭止之而出已金代之償主人夫婦得全宗仁後至九十有七乃卒

孫達猗氏人洪武中登進士第志意卓然與同年友黃子澄練子寧爲心交及靖難兵起子澄等爲建文忠臣咸被族誅達痛其禍乃棄家逃入深山中至死不歸子孫莫知其處

王旭蒲州人其叔洪武間爲盤屋令坐事論戍旭憫

叔老病恐死戍所慨然代爲戍邊數年無怨色後得赦歸旭與州學正曹月川善所爲詩號鳴巢集王旦蒲州人孝友好義繼母常逼之入井初無怨言有輓漕者覆舟漕粟盡沒不能償坐罪旦聞而憫焉爲出數百金買粟以償其人始得免

王三鑑蒲州人估於天津有鄉人以百金寄一夕暴死其子不知也後二年三鑑歸里出其金還之封識宛然

王崇雅尚書崇古兄也嘉靖中蒲州地大震朝臣奉

命來賑災者爲崇雅父同年進士欲以州中丁絕地予崇雅爲資崇雅淒然曰蒲人不幸被茲慘傷雅徼天幸尚忍取非已有乎且絕丁多寄淺土骷髏不掩盍訪其親戚取貲以爲葬資公仁及枯骨矣其人嘆服崇雅舉進士官至太僕卿

令狐錕猗氏諸生家有鵝畜之池隣人張姓者失鵝徑來攜錕鵝去且詆之錕不與辯已而張鵝復得心甚慚來詣錕謝亦不較也一日自他所醉歸袖中有金在或探之去錕知其人然終身不言

喬繼宗猗氏人官教授歸杜門不入城市繼宗所居距鹽池不二十里巡鹽使者王君其門下士也終不一往見之及使者來謁再三始一見唯寒溫而已縣人苦徭役父老爭詣繼宗乞爲官一言甦困繼宗慨然爲書以告於是民累始減

張甲徵蒲州人萬歷壬午舉人繼登進士有同年子漂浮無歸甲徵召至其家延先生教使讀書而以五百金爲償所負同年子感激力學後舉鄉科曰成我之德終身不敢忘

郭九殷猗氏人官王府教授爲諸生時有懷金來謁求九殷爲關說官府者力拒不納曰吾受其金而爲之請不且自污以污知己乎

荊州任猗氏人爲長治教諭縣吏王俊以罪瀕死州任捐俸二十兩拯之俊感恩欲以女爲州任妾州任曰吾哀汝代人受過故以俸金救汝若納汝女非義也復資以金而遣之

荊爾挺臨晉諸生崇禎甲申國變帝后殉社稷爾挺聞之呼天痛哭取冠巾還之學宮不復求進自放

終其身

楊惠芳蒲州人侍郎俊民孫崇禎丁丑進士以工部郎家居甲申春李自成下蒲州其僞防禦吳養德等擒惠芳逼使仕賊惠芳不肯從乃止

王巖楨猗氏舉人 國朝順治初土寇攻猗氏其令出走寇將屠令家巖楨使人說其魁得免頃之寇去而令自他所以援兵至疑猗氏城中人附賊亦欲盡殺之巖楨偵知之急謁令言猗人不反且曰公百口在危城中非猗人亦不能全也令乃止巖

楨復說令盡出軍中所俘子女遣還其家民獲安堵

張國泰榮河人勇敢尚義 國初寇盜未靖衆言於榮河令舉爲練總以備賊康熙元年秋有羣賊突至城下奪門入守者莫能遏衆皆惶懼國泰聞有賊急趨至橫身當之引矢三發殺三人賊乃退榮河之獲全者泰之力也

薛毅永濟人少爲諸生性端謹敦內行其弟當暑月死毅晝夜守其屍哭不去後母喪哀毀哭泣三年

不出戶久致疝瘡前後州牧聞毅賢將以孝行方正舉之皆力自辭中雍正丁未進士任蠡縣令以父憂歸服闋補官得貴州之龍里龍里皆蠻夷地遠且惡大冢宰欲爲之地使改授毅謝曰龍里雖險遠毅自得之且必以其惡而避焉規獲善所誰處其惡者乎聞者高其義赴官六月而卒

謝廷輔臨晉人夏月赴田中獲襪金可數百許蓋人所遺者將俟其主還之久不至會日暮乃攜以歸明日復往見邵陽人王德者自言失金狀甚悽悲

廷輔呼至家爲具酒食舉還之德驚感欲分金爲
謝廷輔不肯曰苟欲此則不以之還子矣與廷輔
後先同時蒲州楊選劉榮猗氏諸生喬巖及國
朝康熙中臨晉人王賜級並以還遺金稱巖爲人
尤長者賜級嘗焚券數百不責人償馬少游所爲
鄉里善人者也

陳勝猗氏人也宣德中大饑勝出谷三千石以賑巡
按御史表爲義民立坊以旌自勝後其出粟賑荒
者正統中有猗氏喬通蒲州趙從政景泰中有萬

泉牛讓成化中有蒲州李子隆萬歷中有猗氏荆
一書通與從政子隆並旌門而一書授義官至崇
禎十三年猗氏諸生荆世承蒲州人張四廕亦皆
大出粟助官府爲賑世承所輸至二千餘石四廕
以千金然其出粟尤多至萬七千石者有猗氏王
錦錦天順時人以是授宣義郎云至 國朝康熙
中而有猗氏明經衛旣翕中丞旣齊弟也歲辛未
大饑縣令爲粥以賑旣翕輸粟百石焉又周其宗
族親戚不自存者亦數百石齊饑黔敖爲食於路

以食餓者檀弓記之以爲於人有利愛之心焉當
萬歷末祲甚猗氏諸生喬梓施粥以賑及冬復爲
衣衣凍者王光宙者臨晉諸生也萬歷戊子大疫
人多死爲廣設醫藥以救之同時蒲州人張繼恩
者亦殫貲爲粥食餓人市棺以殮餒死或助坎埋
焉

義者世之所貴而凡爲義亦各有大小輕重之
分焉重且大者出之而是行之而得斯全乎君
子長者之行矣若羅道琮則可爲久要不忘孫

達荆爾樾庶明乎出處之節王崇雅郭孔昭殆
潔於守己令狐錕之事其風厚矣自世敝而俗
尚褊吝於是以出金錢能施予爲義還金貸粟
羣驚爲難抑所爲義者此固非其甚貴而且重
特以衆所莫肯而行之如是是亦有以過於人
故自賈宗仁以下類次之去其靡者舉其尤者
若夫陳勝出粟至三千石非素豪慷慨亦誰能
然且受託死亡而不利其有王忱是以列於獨
行也若三鑑者近之矣

義行續

韓瓚蒲州人孝友敦睦州有張姓者負人金責償甚厲不能還因遁去瓚憫其窮爲如數償之張不知也有何氏者負瓚逋至八百金終莫能歸瓚召其人與飲卽取券焚之

吉萬方永濟人少時母病萬方禱北斗願以身代已而母愈有二兄已析居事之甚恭萬方爲人尚義好調人急里中有長不能娶者親死不能葬者皆資給之使成其事常於凶歲買饑人二女爲婢後

一年歲熟卽召其父還之不取值焉萬方當爲縣
佐未仕而卒

崔志哲永濟人素有善行順治己丑之變賊遣僞吏
至蒲州責餉志哲有弟久析居弟死姪幼以當輸
餉被縛去志哲知之奔追及隸曰彼少不省事餉
宜問我因解姪使去而取索自繫縣中聽僞吏所
爲會國兵討賊者至僞吏宵遁志哲得免又有石
若璘者虞鄉人康熙中縣人欠官租多不能償將
賣其妻若璘見而憐焉卽出金爲償如數使毋賣

於是夫婦復完麻昌宗亦虞鄉人佃人李共臣負租數載昌宗緩其追及共臣死妻欲嫁昌宗聞之曰若有子何嫁耶謂租不能償我當貰若因取負券悉毀之妻感其意遂不去留撫其子得長焉

永濟楊作楫貢士也生平好行善鄉里窮困者多方卹之有衣食其家至老死者魏如唐者生女以貧不能養將棄之作楫爲之覓乳育於家至五歲召如唐歸之虞鄉朱時逢亦稱長者嘗有佃其田者負粟二十石因以其妹請爲婢送之時逢家時逢

問狀爲之泣下曰若何爲如是立遣引妹歸

喬雲閣猗氏人雍正癸卯舉人康熙庚子辛丑歲邑
人大饑雲閣出私粟七百石以賑其親戚鄉里弟
雲瞻庚子副榜舉人亦有義行嘗買婢五年矣婢
父瞽且無他子女雲瞻憫焉聽贖女歸嫁得依壻
以老陝人有魏某者寄食猗氏數十年及死雲瞻
爲之葬且助魏子使婚人多其長者

蒲少府志

卷之四

九

隱逸

隱者焦先河東人也後漢中平末與同郡侯武陽相
隨避白波賊往揚州建安初西還武陽占戶大陽
先因時亂獨竄河渚食草飲水無衣履大陽長朱
南見之以爲亡士欲捕之武陽語長曰此痴狂人
耳遂註其籍日給米五升先行不踐邪徑饑不苟
食寒不苟衣自作一瓜牛廬淨掃其中天寒搆火
自炙饑則出爲人客作飽食而已不取其值嵇康
高士傳曰世莫知先所出自陝來居大陽無父母

妻子見漢室衰乃自絕不言河東太守杜恕以衣服迎見而不與語後因野火燒其廬先乃露寢冬雪大至袒卧不移人以爲死就視如故度年可百餘歲乃卒司馬景王聞先如此常使安定太守董經因事過而視之先終不與言皇甫謐曰焦先何人吾不足以知之也自羲皇以來一人而已魏氏春秋曰故梁州刺史耿黼以爲仙人北地傳玄以爲性同禽獸並爲之傳而莫能測之

張坊唐河中萬泉人咸通末進士登第知天下已亂

遂隱不出後朱全忠屯河中聞昉才使人召爲判官佯以風疾堅謝謂其子曰吾固不欲仕此世且亡唐者此人可使辱我乎後將遊峨嵋遂棄家去入蜀不知所終

李瀆宋河中處士父瑩宋乾德初爲殿中侍御史終贊善大夫初瑩無子禱於河神而生瀆故以之名即字爲河神旋改長源瀆性淳古博究經史十六丁外艱杜門潔居無仕進意王祐典河中知其賢深加禮接由是名日著不親產業時往來中條山

所居木石幽勝爲人談唐室已來衣冠人物歷歷可聽州將前後至者並厚遇之王旦李宗諤每勸之仕皆不答州閭之人咸化其德會真宗祀汾陰孫冕言其隱操陳堯叟復薦之因召見辭足疾不起上遣中官至其家勞問令長吏歲時存撫焉瀆自陳習靜避世又素嗜酒扶衰養疾捨此莫從天禧三年語其子曰山水足以娛情苟遇醉而卒吾之願也吾將與爾永訣一日忽曰適有人至牀下

誦詩云行到水窮處未知天盡時言訖不見吾當

逝矣亟促家人置酒頃之卒年六十三詔贈秘書省著作佐郎賜其家帛二十匹米三十斛

薛繼先河中府人金南渡後隱居洛西山中以讀書爲事與人交謙遜和雅所居化之子純孝有繼先風人或詐爲繼先書來其家就純孝取物時繼先適亦在家雖年已老而容髮尚若壯者人故不識繼先特以爲卽純孝以書與之繼先不言如所索取付之其純厚如此有御史行部過其所欲見繼先繼先謝不見曰今時政未必皆善御史一有所

劾人必疑自我發之他日當有受其禍者金末病
歿於宜陽

麻革臨晉人秉彛孫也自號貽溪子革當金末時以
讀書自樂隱居不仕先人有別業在王官谷因就
而居焉教授生徒賦詩與元好問相和淡素逸處
終其身人稱之曰貽溪先生

山西通志列革于文苑臨晉志附秉彛傳列在
人物然革當以隱逸見云

馮志恩滎河人少尚志節金貞祐之末避亂入太華

山遇隱者田玄圃遂師之自是無當世意及兵息還鄉里依先人茅屋以居洒然自樂年齒已老行不杖坐不倚目光澄然至九十餘卒

楊守中猗氏人明洪武中有薦其學行者詔徵至京師欲授以官守中見上伏而不謁自陳愚鄙不知世務官非所任上遣再喻之居半歲不易其志乃詔有司以禮送還其鄉或曰守中蓋元之遺民也謝麟蒲州人明成化中以人才被薦授鄴城丞麟性剛不能與時俯仰遂棄官歸得州東青渠之地而

居之構桂莊書屋屏絕人事躬耕讀書終身未嘗
至城市有古隱士避地者風

古蒲衣即被衣也本一人耳山西通志載之蒲
州以爲隱逸而分之爲二又有唐李純夫宋張
愈夫張愈在宋本爲蜀人而純夫則元人稱唐
已誤且云元宗召之不起不知其爲元文宗文
字遺脫而幾若以元宗爲唐之明皇帝誤逾甚
耳若蒲州舊志所列幾至四十人猗氏志亦載
者有九常觀前史後漢傳逸民唐書傳隱逸並

以二三百歲之久合天下之大而其隱操可錄
者且不滿二十人一代之史於是已足蓋賢人
君子才足自見乎世而潛鱗戢羽不復用者之
爲逸懷貞絕俗貴利不屑其意樂志處素山林
不違其高之謂隱故惟行成獨往潔表人區守
介若氷被褐懷王者斯旌帛重其幽芳風流耀
乎巖谷相彼遐躅夫豈易稱若乃所抱無奇抗
志非遠進殊負薪垂釣之踪退異耕石鑿坏之
跡徒欲以黃馘槁項牧犢終身白屋呻吟博士

殉業者當織簾之逸軌儼賣藥之餘風則創牛
人盡君公門卒名皆梅福河上丈人漢濱父老
亦安足復貴乎

方術

孟羽隱士也居於永樂占候望氣往往甚神然不肯輕言亦工相人李懷光未叛時常私謂所親言城中
有反氣比懷光舉逆知其人遣使問之曰作天子
否羽答以不識懷光怒將擒斬之羽先一夕已
知之即遁去十餘日復還曰吾夜觀反氣已漸滅
賊當自就誅翦矣後果然

孟羽見旨炙閒談山西通志藝術有馬遠而無
羽馬遠久居浙無與河中也

苗訓河中人善天文占候之術仕周爲殿前散員顯
德末隨太祖北征視日上復有一日久相盪摩私
謂楚昭輔曰此天命也至陳橋太祖爲六師推戴
訓皆預白其事既受禪擢爲翰林天文官加銀青
光祿大夫檢校工部尚書年七十餘卒

楊炳蒲州人精醫術決人生死未嘗失一日往安邑
一少年聞其技欲試之遽自牖中躍出佯卧牀上
作呻吟呼救人謂炳診之炳視脈大驚曰其內已
重傷恐腸將裂不可救也左右者皆笑詆炳炳曰

吾但據脈決之耳至夕少年果死衆始服爲神
潘毓僞猗氏諸生工岐黃術究心內經字句註釋久
之盡達其旨每製方劑多出新意往往奇中活人
多矣

張汝霖猗氏人少爲儒生後學岐黃術研精入妙一
僧於暑日汲井水沃其頂汝霖見之曰法於一月
後當患頭痛僧初不然之及期頭果痛不可忍乃
詣汝霖求治曰不復須藥至一年痛當自止但牙
齒當早落耳踰年僧齒果落去大半而頭痛輒止

其他視人疾病巧中多若此尤精太素脈決人生
死壽夭無不驗一日呼其子語云吾某月日當死
因徧召親友相聚歡噱明日衣冠而化人爭異之
汝霖年九十有四

楊文昭蒲州諸生隱於藝嘗游京師所交皆一時名
碩錢尚書謙益曹中丞於汴程布衣孟陽尤莫逆
云文昭嘗以檀香鑲佛像宛然如生

趙興運滎河人明天文壬遁之學順治初嘗語儕輩
曰吾夜觀天象執法星北流當有貴人潛出者時

御史劉達按蒲州微行訪事適奏厠聞興運語不覺悚然急遣所隨吏邀之欲延入署興運避不見而去

張積素猗氏人少嗜畫師其鄉先達王含光遂深悟畫訣作山水殊勝爲輞川圖及太行圖卷尤爲見者所稱積素既好畫老且不倦時時爲人作之其山水格韻頗高又以餘暇爲水墨花草禽虫悉生動多野逸意態初積素父幡然居鄉里以謹愿稱壽踰九十乃歿積素之卒也年八十一人謂其世

有隱德焉

錄方術於仙釋之上何也游方以外者於物無
與而醫卜事之所用民之所資有道或托隱焉
爾

仙釋

張果不知何許人也武則天時隱中條山自云年數百歲矣則天聞之使人召果果佯死不赴人後見果於恒州山中明皇帝開元二十年上知果有奇術道行再遣使迎之果乃至召入宮中訪以理道并仙人方藥之事又以果所爲多變化不測心疑之時邢和璞善算又有師夜光者善視鬼神上令二人算視果並莫能知其所由來他日上欲以玉真公主妻之未言而果已知因力辭還山許之賜

號通元先生果至恒山蒲吾縣未幾卒或言其尸解焉

唐人作張果傳謂果爲堯時蝙蝠之精語尤妄矣

呂巖唐時人或云巖家河中永樂縣故禮部侍郎渭之孫也嘗舉進士已而棄去爲道士徧游山川因得仙人術世傳巖遇漢時鍾離權者師之故道家稱有鍾呂傳道集巖嘗賦七言云羅浮道士誰同流草衣木食輕王侯世間甲子管不得壺裏乾坤

只自由又有三度岳陽人不識朗吟飛過洞庭湖
語蓋巖好劍術亦嗜飲酒至宋時一日過湖州沈
東老家飲醉以榴皮書其壁曰西隣已富憂不足
東老雖貧樂有餘云云及去而始知其爲巖也今
永樂亦有巖碑謂是巖擘瓜皮所書者筆畫奇恠
永樂純陽道院卽巖故宅自宋以後世多傳呂仙
事人亦往往有遇之者

通志引道家所錄以巖爲呂渭之孫生天寶十
四年四月十四日至咸通中舉進士云云夫天

寶距咸通且百數十年安有巖生元宗時而於
僖宗世舉進士之理且呂渭以德宗建中末始
官禮部侍郎計天寶中渭年尚幼安得有孫哉
其說之誕而無足信如此

唐侯道華虞鄉人爲道士事鄧天師身常執賤役暇
卽讀書終日不輟或問何以書爲答曰天下無愚
懵仙人也一日天師得仙棗道華竊食之於白日
拔宅上升

唐段成式亦記侯道華升仙事在當時意實有

此若蒲州志與山西通志所載殊異特甚蓋皆無徵者也

房居士者明初臨晉人棄家爲道士中條山操行勤苦一日至虞鄉止扁鵲廟遇真人教之遂得道術去居汾北麻衣山又往平陽姑射山洞中棲焉猛獸並爲之馴月餘不食無饑色時于肅愍謙方爲山西巡撫因訪之問以吉凶不答于去謂其弟子曰此公不善其終後果驗成化甲辰三月卧而化去先是洞中有石牀二其左爲唐時得道者所化

至是居士在其右若相待者

曇延猗氏王氏子隋時於蒲州棲巖寺爲僧聞講涅槃經意卽朗悟有薛居士者試指方圓動靜四字令延說偈延卽應云方如方等城圓如智慧日動則識波浪靜類涅槃室開皇中旱召延祈雨頃而大沛其徒慧海道懸並虞鄉張氏子亦稱高僧

雲潤者虞鄉梁氏子十三出家爲僧初聽涅槃卽通文旨聞泰岳雲巖寺僧規清肅乃往尋焉與法侶登山野燒四合衆皆惶奔唯潤安行顧衆語曰心

外無火火實自心謂火可逃無由免火後住弘福寺房元齡見之歎曰居宗揚化唯此人耳

重宣虞鄉趙氏子爲僧河中開元寺堅持戒律功行勤篤宋真宗時與萊公寇準善寇公言於上真宗賜紫衣以旌其德咸平四年示寂楊翰林大年爲撰塔銘

洪濟猗氏雲巖寺僧也有道行通大小乘法遊金陵時明太祖將登極風雨彌日太祖不懌濟請祈止之因杖錫一呪而霽天日開朗上大悅賜經一藏

給傳遣歸

福登明蒲州萬固寺僧也初不曉文字力修禪觀閉關三年遂成夙悟無不通曉神宗聞之賜以繡衲并號真來佛子福後居五臺坐而逝慈聖太后遣中官葬之

仙人長生以度世應真超無而留迹世固有是然亦必其事爲近正而可信乃得書之若荒忽僞妄出於二氏之徒所記言唯滋恠惑識者所勿取焉晉書載佛圖澄平旦至流水側從腹旁

孔中引出臟腑洗之訖還內腹中此澄在洛陽
時而蒲州志山西通志並云澄住中條白石寺
炊粥無具寄米於屠牛釜中人嫌其穢澄乃出
腸浴於泉上至今泉上有血痕則假晉書所載
者而加以誣飾且白石寺始造於隋唐之世澄
在十六國石趙時又安得於此先有寺而爲居
耶大抵緇黃者流每好神其教不自知其說之
鄙野往往雜出以欺世是固無足道者至於屬
之記載而若將信其爲然斯學士大夫之失矣

涪州府志

卷之十四

三

寓賢

猗頓魯人也耕則常饑衣則常寒聞陶朱公富乃往而問術焉遂往牧牛羊於猗氏之南十年之間息不可計富擬王公名馳天下以興於猗氏故世號之曰猗頓

樂恢京兆長陵人事漢博士焦永學經永爲河東太守恢從永之官閉戶精思不交人物後永以事被考永諸弟子並以通關被繫恢獨皎然無所汚後以名儒徵爲議郎

閻案江州人唐貞觀十四年爲蒲州刺史後棄官隱中條山至十九年復召爲吉州刺史後請爲道士賜名遺榮其後人傳王官谷上方有閻使君宅

陽城北平人徙陝州夏縣及進士第乃隱居中條山陝虢觀察使李泌數禮餉之欲辟致之府不肯起乃薦於朝詔以著作佐郎召城并賜緋魚袋使參軍事韓傑奉詔至其家城封還詔書自稱老病泌不敢強及爲宰相又言于德宗于是召拜右諫議

大夫

王縉大原祁人少有文才與兄維齊稱唐天寶初客河中依其節度使居者數年後舉草澤以文詞清麗科登上第位至宰相初維以開元中進士官長安于藍田營別業維與縉特相友愛維在藍田而縉寓居河中歲時不相見每於賦詩見其情維九日詩遙憐兄弟登高處徧插茱萸少一人蓋指縉言之

徐商有功五世孫本東莞人也唐會昌中寓河中隱中條山下後擢第至咸通時官宰相

李商隱懷州河內人第進士屢掌節度書記吏部員外郎卒於滎陽商隱爲晚唐詩人之冠武宗會昌中嘗移家來寓居河中永樂縣故有到永樂縣居書懷詩居永樂久之嘗自云所居一草一木無非自栽今春悉已芳茂因卽事賦詩凡商隱集中多有永樂之咏同時太原溫庭筠名與商隱齊與徐商友善宣宗大中間徐商節度河中庭筠因來依之亦僑河中有蒲州河亭陪節度讌遊之作而商隱有寄劉韋二前輩詩自注云二公先嘗於此縣

寄居不知其何人也

李純甫弘州襄陰人舉進士喜談兵金章宗南伐純甫上書策勝負以薦入翰林及宣宗遷汴高琪擅威福純甫知其必敗遂辭官去已而復入翰林出倅坊州改京兆府判官卒於汴純甫少負才謂功名可立致嘗由小官上萬言書爲當路所忌抑乃縱酒自放無意仕進嘗去遊河中隱中條山數年日與禪僧道士者游嘯歌袒裼出禮法外人以酒招者不擇貴賤必往往必大醉嘗醉卧中條山谷

間數日不醒樵者呼起之始歸

成德順天懷柔人明崇禎中以御史言事謫戍陝西
莊浪衛德自成所至臨晉因寓居焉有楊氏者使
其子就德受學德在臨晉凡七年值赦還復官郎
中甲申京城破德死於難

周明德河南南陽人乾隆之初來遊河中其子遐齡
連爲滎河臨晉永濟三邑宰故明德皆至其地而
居永濟者凡數年明德本諸生暢曉世務優於幹
濟其在河中也嘗微服間行縣中求民疾苦歸卽

語其子使除去之有民利則使興道之故於三邑
皆有施被而及永濟者尤多向號難治至是安然
永濟人感之最深及卒於官舍吊哭者千人喪歸
南陽不遠千里羣往爲立碑墓上

蒲州府志

卷之十四

三

續傳

祝春蒲州人學行冠一時有偉望明初以儒士舉爲通政司參議累擢詹事府少詹事卒於官太祖惜之賻卹特厚

苟汝安蒲州人嘉靖乙酉舉人歷官四川按察司僉事呂經野贊曰在中州爲良有司在南臺爲真御史在西蜀爲名僉憲此可以知其人矣

楊時芳猗氏人四歲能辨四聲十歲以童子謁縣令賈試以課對云青燈夙負青雲志對曰赤縣長懸

赤子心令撫首嗟異十三歲入庠弱冠舉庚子鄉試授寶坻知縣調正寧陞慶陽府通判督餉寧夏舉綱振維不緣俗吏文法中貴人捕銀魚止傳舍銜不刺謁因擠排之乃曰以此受污芬香多矣或言其城荒涼曰萬井鹹水一片沙葱正吾着力處也及歸敝衣羸馬恬淡自如

楊俊民博子也嘉靖四十一年進士除戶部主事歷禮部郎中隆慶初遷河南提學副使高拱甥劉生得罪杖黜之拱兄僉都御史捷歿有司請祠弗許

尋轉右參政萬歷初入爲太僕少卿博致政侍歸
起故官累遷兵部左侍郎署部事時議撙力克嗣
封俊民言欸未可遽罷惟外勒西部使盡還巢申
定市額使無濫索而已議遂定進戶部尚書總督
倉塲十九年還理部事河南大饑請發銀米各數
十萬以稽緩自劾求罷疏六上不允小人競請開
礦爭不得滿三考累加太子太保卒官贈少保後
贈少傅兼太子太傅

韓楫蒲州人嘉靖乙丑進士選翰林院庶吉士遷刑

科給事中忠直敢言穆宗登極前後三上劄極陳
君道在正始元輔徐階持其疏稱爲中興第一又
以薛文清瑄學術醇正疏請從祀後累官至通政
使

楊相蒲州人嘉靖乙丑進士授成安知縣擢御史按
陝西茶馬繼按河南巡京營心體洞豁遇事剛果
考成憲酌時宜疏言茶馬四事理財三事皆關大
體至論成國不當追王膠河不當動衆尤爲時所
稱誦轉山東副使湖廣參政以疾告歸

董汝漢萬泉人嘉靖乙丑進士授咸寧知縣陞兵部武選司主事絕苞苴門無私謁遷寧夏兵備副使順義王將東歸尚負固未發汝漢直言撫之感服而去轉關南參政亂民聞風解散晉左右布政致政歸居鄉二十年加惠閭黨待以舉火者百餘家孟時芳蒲州人同知琳孫也萬歷戊戌進士初選翰林庶吉士掌院劉文莊曾文恪胥器重之分校丁未禮闈擢國子監司業以御史辱國子生東宮不親講席皇太孫未出閣抗疏力爭時稱得體遷諭

德掌南院篆購遺書數萬卷資諸生講習入爲詹
事府詹事侍講筵儀容嚴重議論剴切光宗嘆息
稱善遷南吏部右侍郎轉禮部充實錄總裁官晉
尚書值魏璫用事決計致仕

楊宗業蒲州人武舉官都督僉事浙江總兵萬歷間
殉難贈都督同知

劉以平猗氏人嘗聘妻後瞽及將婚女父母以次女
易之以平不可竟娶瞽者萬歷庚辰進士由戶部
郎出爲潞王相王好畋遊數諫勿聽知王明日復

出將叩馬阻王王怒以馬箠桷其手以平固諫乃
止不出擢雲南參議平阿克等土司遷苑馬卿致
仕歸

李嵩榮河人萬歷甲辰進士自行人選御史神宗稱
其直出按吳中時方大饑上章請賑發帑金四十
萬以疏救御史劉光復左遷復起河南道御史擢
太僕卿巡撫登萊終南京戶部侍郎

李棲鳳臨晉人萬歷甲辰進士由知縣入爲刑部郎
擢神木道有破斬西虜功復議革套酋吉囊舊賞

省金錢三十萬後擢巡撫湖廣以憂歸崇禎初起
兵部侍郎鎮昌平道卒

周有光榮河人隆慶辛未進士初爲戶部主事督通
州草場歲久草多浥敗例責草戶償折往往至破
家有光爲請開除得旨盡免焉有光居官廉潔自
曹郎連任陝西河南湖廣道皆以清明著嘗舉古
人詩曰此鄉多寶玉慎勿厭清貧以自儆云歷官
十五年還家橐嘗罄萬歷中山西布政司下教均
徭榮河令議曰加丁則苦民加地則苦大家有光

曰寧苦勢家不可重困百姓於是隣縣皆加丁而榮獨加地其後榮河徭役視他縣獨輕人賴其賜焉

杜思望猗氏人萬歷壬辰進士知文安縣縣多中人宗族倚宦者爲民害思望法繩之不少假縣有陂田葦荻之利歲入於官者數百金思望不取曰文安之物還之文安秩滿當遷官未及而卒

張含瑾蒲州人國朝順治己亥進士任建昌府推官善決獄有大豪黃某者殺人捕於獄使人致于

金請免死含瑾不許卒正其罪後改官知廣東陽春縣縣介萬山中爲盜窟含瑾帥衆躬擣其穴而取之以憂歸補知宜興縣病免

衛紹芳猗氏人順治丙戌進士自知縣入爲曹郎出爲福建漳南道時有逋寇廖明祈倚險爲亂汀州兵圍之數月未下紹芳相形勢決水灌之賊潰遂被擒轉川北道郝承裔反於蜀紹芳時督餉協勦知賊未犯成都卽倍道至嘉定已而賊平叙功遷督貴州學政歷浙江巡道致仕

杜篤祜蒲州人明崇禎丙子舉人入國朝累官戶

部侍郎左都御史加太子太保康熙九年夏大旱
篤祜上言天旱不雨麥苗盡枯災祲已成而有司
以催科爲急日事敲扑小民救饑不遑追呼叠至
必至流離請停直隸山東錢糧之徵以蘇民困又
言頻年以來星變水旱河決地震皆貪官橫斂奸
吏作蠹民有冤抑是以上干天和近蒲州民吳守
已赴闕訟其州長吏貪穢贓私無算而山西巡撫
讞問並斥爲虛致守已死於獄中其子訴冤復置

之罪若此之類不可勝數古云下民易虐上天難欺一婦含冤三年不雨請嚴勅督撫諸臣力圖修省審擬從公勿縱貪吏使小民枉抑以格天心又上疏請勤講讀以佐典學皆稱於時

喬于瀛猗氏人康熙庚辰進士自知縣歷官部曹爲驗封郎中出任廣西右江道右江地多番夷時獐人藍章爲大府所購方負險拒捕而泗州土知府岑映宸亦思盜兵廣西將騷于瀛兩往招諭之遂以無事坐觸瘴癘病卒中丞以下賙之喪得歸

趙之璿榮河人 國初拔貢知河南沈邱縣縣苦徭役不均世世爲患之璿至爲革除之有大猾殺人而匿其屍蘆中久不得主名之璿告於神神夢示殺人者因收猾正其罪遷郴州知州到官數月解組歸自號澹足以見志云

田厥茂永濟人順治丙戌進士累官福建布政使卒於官厥茂所至有聲績嘗督學陝西號爲公明秦人稱道之

史鵬萬泉人順治八年貢士知河南虞城縣立志剛

方制行忠厚爲治多英畧豪右屏跡廢墜並舉以
性耿介多與時忤遂致政歸同縣馮夢麟者順治
十一年貢士任浙江歸安縣丞寬仁謹厚服官有
清操未老亦致仕縣人並敬之

楊景震萬泉人幼敏慧年十一卽爲弟子員十九萬
泉令方奉上官檄舉邑士之有文行可當孝廉選
者因以景震舉焉景震聞之自以年少未學赴縣
力辭令知其意誠且堅乃聽焉識者皆多其明退
讓之節景震雖終不第然力學無倦後以教習當

選爲縣令未仕而卒其年九十云

謝敦懿臨晉人順治初以進士知玉山縣再補臨湘縣時賊李來亨等據房竹西山官軍方勦之臨湘辦軍食五百石以五百人運之往又須戰艦二十軍府下檄甚迫必三日皆具敦懿悉應給焉時稱才吏方治軍需時縣民聚城下勢洶洶敦懿懼有變躬出撫喻之衆乃定後遷主事符未下而已卒於官年僅三十二縉紳多惜之

王含真猗氏人康熙乙卯舉人明年成進士會朝廷

有博學宏詞之舉或以含真名薦焉當赴京師試以父老不欲行其父強使之不得已乃往試之明日卽歸於道聞父喪屏水漿者累日服闋將授官會病卒含真生平好義師友困乏者能賑卹之一荆時中猗氏人康熙初以舉人知山東聊城縣縣當水陸衝頗號難治時中至摘奸汰冗邑政咸理甲申山東大饑民乘間刼掠時中捕首惡誅之餘悉奔散適截漕米二萬石賑山東十八縣上官遣時中經理之給散旣均民皆被惠秩滿遷戶部主事

再遷監察御史卒

自時中後爲猗氏人所稱紀者有令狐言東陳
憫儀云言東中康熙丁酉舉人未及仕憫儀以
雍正甲辰進士凡三爲令終於官

崔繩武永濟人康熙癸卯舉人知江南如臯縣前令
三人並以滯征賦罷官不能歸羈邑中繩武至知
積逋之弊本由里胥於是革去之更爲立法數年
課未入者悉償於是三令者得釋然去縣歲有修
戰船之役民或當此徭則產立破繩武上請大府

寬爲之期紓督促嚴迫之令而民免於累榷例蘆洲在江上者官丈其地以徵稅凡溝渠廬舍皆取丈焉名之曰丈增繩武獨去之民得減輸咸共感悅立祠祀焉子偉觀康熙壬午舉人任阜平令亦能治其縣

賈涓永濟人

國初時以拔貢任蠡縣知縣涓事親

至孝色養備至傾其資以營教諸弟及爲蠡令在官四載宿弊盡去爲蠡人所懷及卒署內蕭然不能歸喪蠡人爲賻贈以送之始得還葬

傳有續何也古爲國志或先賢或後賢以其時
世區而記之不必其合也若予此篇書祝春楊
俊民等不以繼韓爌張庭後而別舉備於冊夫
豈無說哉

蒲州府志

卷之十四

三

蒲州府志卷之十五

列女

永濟縣

北魏

姚氏女字勝河東人少喪父無兄弟年六七歲卽有
孝性言其父者聞輒垂泣正光中母死勝年十五
哭泣不絕聲水漿不入口者數日不勝哀遂死太
守崔遊申請爲營墓立碑自爲制文表其門閭比
之曹娥改其里曰上虞里

隋

裴倫妻柳氏河東人少有風訓大業末倫爲渭源令
爲賊薛舉所陷倫遇害氏時年四十有二女及兒
婦三人皆有美色柳氏謂曰我輩遭逢禍亂汝父
已死我自念不能全汝義不受辱於羣賊將與汝
等同死如何女等垂泣曰惟母所命柳氏遂自投
於井其女及婦相繼而下皆死井中

唐

樊會仁母敬氏蒲州河東人字象子笄而生會仁夫

死事舅姑祥順家以其少欲嫁之潛約婚於里人
至期陽爲母病使歸視敬至知見給乃外爲不知
者私謂會仁曰吾孀處不死者以母老兒幼今舅
將奪吾志汝云何會仁泣敬曰兒母啼乃伺隙遁
去家追及半途以死自守乃罷會仁未冠卒時敬
母又終既葬謂所親曰母死子亡何生爲不食數
日死聞者憐之

明

段小五妻李氏年二十一夫亡無子母欲嫁之誓死

不從奉侍翁姑供養無缺後翁姑年八十餘終以禮殯葬事聞於朝表爲節婦

薛剛妻楊氏生子小來剛當行戍顧謂楊曰吾親老子幼我生死不可必願終養吾親楊曰諾剛果死於軍楊恪奉舅姑撫幼子未幾小來補戍亦歿於軍舅姑相繼終楊慟哭以所居易財營葬閭里勸其改適楊曰人無志節禽獸何異吾寧死不爲禽獸行就食於弟家操持愈嚴知州徐孚聞於朝詔旌其門

解輝妻董氏生子福寧未晬夫卒董年二十二蓬首
垢面父母以其少寡欲令改適董曰親老子幼苟
舍而之他子無所怙舅姑必殍於溝壑吾忍爲之
乎於是益盡婦道紡績營衣食美食奉舅姑自啖
粗糲舅姑歿與子負土穿壙以葬旦夕悲號知州
徐孚上其事詔表爲貞孝之門

王寅妻嚴氏年二十一夫卒嚴三十年足不踰閭屏
簪珥事姑育子貧苦自甘事聞旌表

張文俊妻屠氏年二十九夫亡欲自縊以殉人勸以

翁姑無依乃止紡績營食以養舅姑孀居五十餘年巡按御史上其事詔旌其門

生員苟儀妻王氏儀歿悲慟欲絕及葬下棺投身壙中賴姑救免自是屏簪珥綺繡不御母勸他適誓死不從州守上其事詔旌其門

生員史璘妻宋氏歸史未三年夫疾歿月餘生子廸宋紡績爲生終無他志訓子讀書成立守節六十餘年八十一歲卒

郝璠妻衛氏年二十三璠卒生一女在襁負或誘其

改節衛曰我衛女郝婦皆蒲名族忍失節背義以爲兩門辱守節六十餘年八十七歲卒

嚴圭妻王氏年二十夫亡父母欲奪其志王以死自誓不能強而止晝耕夜績以供舅姑卽荒歲未嘗乏鄉閭賢之年九十一歲卒

姬懋妻楊氏懋以戎籍應伍留妻事親後懋卒遺子幼楊事舅姑撫子孝慈兼盡凡五十餘年七十七歲卒

孟子厚妻牛氏年二十五子厚歿牛矢志不移父母

不能奪遺孤三歲撫訓有方事翁姑盡孝年踰七十守節無虧

生員史夢陽妻王氏婚僅踰歲年十六夫以赴試卒逆旅誓死守節生遺腹子艱心撫育後以地震卒巡按以貞節旌其門

蕭鉉妻張氏年十七夫亡懷妊生子世榮翁姑相繼歿皆以禮葬撫孤成立州守聞於上免其孤子差役

張璠妻劉氏年二十四夫客死中州僅遺一女劉聞

訃誓欲殉夫父母守護之姑病卧蓐再三勸慰劉
遂斷髮毀面辛苦三十餘年竟還夫柩姑病亦痊
女得婚配皆劉經營之力姑歿以禮殯葬

牛仲明女牛氏劉愷聘而未配愷先娶衛早卒生一
子劉父母聘牛氏預迎以歸愷中途被難頃之衛
氏櫬及遺孤抵里牛撫孤若已出事翁姑至孝服
禪父母慰女曰汝處子未識夫豈真劉氏婦耶牛
曰身既歸劉卽其婦矣親老子幼尚何適父兄陰
納施氏聘牛聞之哀號幾絕泣愷神主前三日不

食死孤成立名釗釗子忠甫子東旭三世皆廬墓
時稱爲三烈孝

楊鷗妻王氏年二十夫歿遺子甫三月王自毀面目
雖至親內人罕見其面孝事病姑始終不怠撫育
幼子身歷百艱一日子偶墜井中經日出之無恙
人以爲苦節所感襄毅楊公誌其墓

洪果妻張氏夫亡年甫二十四歲遺腹有孕甘貧苦
守後生子無以爲養張以女紅易粟自給或勸其
再醮垂泣答以夫情不可忘子幼不忍棄寧死不

移居五十餘年州守以貞節表其門

趙棟妻陳氏棟感沉痾陳侍湯藥勤苦不懈棟疾革詢身後事陳以守節自誓夫歿陳年二十一無子女事翁姑備極孝養州守扁其門曰有共姜風

孟端妻邵氏早寡姑母欲奪其志氏抱幼女亥隕於井八歲女熙墜從之既出屍母猶抱亥熙抱母間巷悲感後十年知州屈拱北始以事聞詔建祠樹坊遷墓罔卿王謙爲之傳都御史曹于汴撰祠碑記

生員楊元祿妻王氏家素貧乏勤績紡以供朝夕祿
故誓不欲生滴水不入口者七日甘心餓斃從容
就死較慷慨殺身更爲難焉

生員田民皞妻雷氏崇禎壬午冬悍將任國奇兵過
蒲所至刼掠氏被擄投井而死同時死者舉人盧
世臣妻田氏又有喬及芳妻張氏闖兵入城投井
死

國朝

展奇第妻王氏順治己丑遇兵變被挾馬上奮力掙

墜者數次時大雨遍體污泥兵恨殺之

生員楊五禮妻孫氏夫亡事翁撫孤克盡其道甲申
闖變翁被害氏藏身廁中污體垢面賊怒揮刃破
額而去氏負創殮翁哀泣如禮後全節以壽終

薛永淳妻王氏少寡闖賊陷蒲被執不屈投井死

裴渤妻張氏夫亡遺一女矢志守養姑姑甚德之曾母
欲奪其志氏抱姑暨女一慟而絕

副千戶韓印勲妻孟氏年二十印勲從征流寇辛苦
節數十載比歿風雨陡發有光燭體閃爍如電里

人異之

訓導張述善妻李氏姜寇變李隨姑王避亂山谷兵迫奮身投崖死又王浩元妻李氏亦以不屈墜崖死

葛振盛妾趙氏姜寇變氏與夫並被擄乃密以簪珥投夫且曰兵營中勿認我爲婦懼汝害也兵欲亂之不從抽刀以脅氏乃引頸迎刃而死

生員張玃妻韓氏避盜入山賊追及之韓顧謂家人曰爾各自爲計無顧我此卽我畢命時也遂投崖

下婢滿兒以手挽之因俱碎焉

李永春妻陳氏年十八歸李越四載夫亡遺子甫三歲家貧女紅自給時里中病疫母子胥染勢甚狼狽陳仰天禱曰黃口孤兒宗祧所係寧斃我毋傷子尋皆無恙訓子凜若嚴師子卒成立康熙四十一年旌

張奇與繼妻姬氏年二十六奇與客死訃聞氏哀毀逾情拮据迎喪歸葬撫前子恩情備至稍長脫簪珥以資服賈家小康淡薄如故康熙五十年旌

姚元度妻左氏年二十元度病革顧謂氏曰我死汝
無守顧俟吾母終年後子幼善撫其成使嗣我氏
聞哽咽不能語洎夫卒截髮毀容盡瘁事育孀居
三十七載雍正五年旌

尚苗姐永濟里民女也有族人素凶淫一日突入其
室欲逼淫之苗姐以死拒遂被殺雍正七年旌

吉無違妻李氏其歸於吉時無違年甚長而李方艾
也居數年生二子一女他日無違外出惡少年踰
垣夜逼之李持刀大罵欲自刎鄰嫗救止之然恨

不止越四日卒自縊乾隆七年旌

石光宗妻王氏年十九而寡一子始生六月舅姑以年少欲嫁之王決不可一日方持刀作羹復有強相勸者王怒引刀斷一指曰吾所不爲石氏婦者有如指且泣且誓血淋漓砧案間家人皆大驚永濟令聞之以匾旌焉王年七十九無疾而卒

姚氏者永濟人劉彥慶妻也彥慶以康熙末歲荒辭鄉里遠去不知聞者數年矣姚獨與姑及幼女家居雍正九年忽有傳彥慶爲僧太白山中者其母

泣語姚慶素愚梗必我躬往召之庶肯來歸耳遂
留姚及女而偕所親行訪求之既至竟不得彥慶
悲感成疾於太白死焉姚痛姑歿在異縣念無收
者謀卽奔喪特貧甚又無宗族近者可託俱行更
三年乃泣告其弟弟隨與往姚得負姑骨而歸葬
焉

裴尚直之妻丘氏年十九夫亡更三年其翁又亡至
二十五其姑復亡也唯孤子是依日夜織紡或終
夕不眠作布自給兄弟憐之試以改適諷丘內自

憤恨致嘔血然終不能移其志也初翁死時姑哭其子復哭其夫遂喪明丘奉之甚至每飯必親噢後姑目忽自明咸以丘誠孝有所感云

馮氏爲張育英妻時年始十三又十年而寡育英縣貢士也舅以其少意欲令其他適馮曰安有其夫號明經者而婦復事人哉卒取姪嗣育英撫之以守志焉乾隆八年旌

生員李應奎妻劉氏

事聞旌門

盧滋妻鄭氏

事聞旌門

郭敦妻喬氏

杜昂妻史氏

王彬妻馬氏

韓玻妻薛氏

子楫孫燠貴
累加封贈

王進妻張氏

卒年九十九歲
奉旨旌異

義民段輔妻王氏

巡按御史旌
楊襄毅表墓

生員羅拱極妻賈氏

楊霆妻屈氏

巡按
表門

趙釗妻尹氏

巡按
旌門

張寧妻雷氏

曾孫四維
貴授封

張楨妻馮氏

萬歷
中旌

甯師賢妻高氏

道院
旌表

杜文俊妻羅氏

奉旨
旌

武生韓塏妻張氏

杜惟妻王氏

河東
道旌

魏士盛妻韓氏

王三宅妻史氏

奉旨旌

葛之錦妻侯氏

張崇茂妻呂氏

王良嘉妻李氏

貢士孟紘祚妻張氏

左永篤妻秦氏

陳邦桂妻張氏

師家讀妻楊氏

光祿典簿王敬妻劉氏張溥妻郭氏

亢光英妻楊氏

張問世妻柴氏

上並明時者

儒童張奇瑄妻解氏

吉熊瑞妻曹氏

吉鳳麟妻王氏

府州旌

集琦妻解氏

府縣旌

吉鳳翔妻張氏

楊澄妻吉氏

有司旌

儒童姚元度妻左氏

雍正六年旌

羅大琮妻吉氏

李泳妻劉氏

永濟令旌

陳大琳妻柴氏

事姑至孝

生員楊茂瑾妻史氏

崔封妻郭氏

李萬椿妻楊氏

乾隆元年旌

鑾儀衛經歷張鐸妾龔氏趙氏

建坊旌

薛永侯繼妻馬氏

楊復運妻姚氏

有司旌

儒童李耀妻劉氏

康熙中有司旌

儒童劉倬妻任氏劉儀妻王氏

張振庭妻楊氏

李玠張氏

生員常謹繼妻高氏 常摺妻左氏 郡守並旌

高尚明妻楊氏 永濟令旌 李進祿妻任氏

張含珽妻羅氏 史振宗妻衛氏 雍正十年旌

儒童楊若崇妻王氏 乾隆三年旌

崔學禮妻樊氏 崔大舉妻樊氏

崔大蔣妻楊氏 己旌

監生楊富春妻王氏 雍正十年旌

李萬奉妻楊氏 乾隆元年旌 劉加武妻崔氏 乾隆二年旌

貢生張育藩妻樊氏 姚津妻劉氏 並乾隆三年旌

監生李作舟妻呂氏韓繼祖妻楊氏侯選州同

侯法妻鄭氏荆養棟妻雷氏生員齊宗德妻荆

氏王樞妻陳氏周昌耀妻陳氏

並乾隆三年旌

翟萬禧妻胡氏生員李薰芳妻張氏

並乾隆三年旌

生員樊世韓妻韓氏韓啟瑜妻鄧氏貢生張育

英妻馮氏吳學敏妻史氏李廣增妻周氏

五人並乾

隆七年旌

高廣妻吉氏

乾隆八年旌

王景清妻李氏

八年旌

趙懷瑾妻劉氏

九年旌

王廷桂妻郭氏

十年旌

劉芳聲妻王氏

十二年旌

李增繼妻田氏

十二年旌

薛大豐妻劉氏

十三年旌

李本固妻楊氏

十六年旌

王大寧妻蒲氏

十四年旌

范毓濱妻蘇氏

儒士任養善妻張氏

薛麟徵妻楊氏

前州守旌

生員楊珏妻吳氏

賀國軒妻展氏

儒士孫忭妻馬氏

劉大聞妻楊氏

劉元恕妻尉氏

候選縣丞張颺妻張氏

有司旌

張永寧妻許氏

臨晉縣

北魏

崔氏金州刺史郭牙妻牙調官當赴留氏事母牙沒於官氏忍容事母不令其知母卒氏竭力治二喪畢不食而死鄉人表爲孝門

明

宋氏年十四適同里黃良德後十年良德卒亦自縊與良德同時葬隆慶間旌表其門

生員王幕妻陳氏年十九夫亡遺子三策尚未期月

時家貧不繼朝夕人皆難之以死自誓織紉作踰
四十年巡按御史扁旌其門

荆世寵妻陳氏年十八夫亡孀居五十餘年閨門嚴
肅人無間言督學陸扁表貞節

王康妻荆氏年十七夫亡子于楚方在襁褓茹苦守
志萬歷二十二年有司奏聞於朝奉詔建坊曰綸
音旌節

邵明紀妻張氏年二十二而寡痛絕數四誓欲從死
家人防之泣囑曰作壙宜濶爲我終身地壙成先

一日閉戶沐浴理粧整容如歸寧狀旋入室投繯而死次日治喪二柩同舉觀者莫不垂涕

張宜妻蔡氏年十七夫亡無子誓不改適茹荼飲水者五十餘年有司上其事奉詔建坊旌表

邵千妻高氏年二十夫亡無子族豪謀業逼嫁氏斷髮刺面以死自誓時千兄邵萬以時疫夫妻同逝遺子孟通方三歲高撫之苦節六十年天啓五年壽八十二卒孟通三年喪以報之有司旌表其門

國朝

姚門雙節者廩生姚在陞妻胡氏暨子翼宸妻李氏也甲申逆闖渡河所過殘掠胡氏謂媳李氏曰賊熾甚倘不免實墮家聲毋寧死之爲愈隨以襁褓子付乳母趨赴深井姑先投媳繼之同時而死當道表其門名井曰雙烈

王氏者少司馬李棲鳳子世昭之妻闖賊入境偕民婦避難蛾蟄原之土穴中爲賊搜索羣驅而出伏地不起賊呵之且脅以刃曰頭可斷義不受辱賊曳之出行十餘步見深崖曰吾得死所矣遂躍下

腦裂而死

王士熊妻許氏年十七而夫亡哀毀欲絕尋即自經
姑覺急解之泣慰曰尚有遺腹倘生男以繼夫後
不猶愈於死耶數月生子挺銓辛苦撫育克承父
業總督白旌其門

劉四維妻張氏家貧甚夫亡子幼苦守撫子國興成
立甫生孫業太而子亡繼撫孫成人婚娶生曾孫
世勤而業太又亡劬勞三世苦節七旬年九十八
而卒

張我侯妻王氏夫亡子在襁褓貧無所依辛勤織作撫子勲成立入庠年八十九卒

生員劉復元妻杜氏年二十而寡家貧無子父母欲奪其志氏誓死不從苦節四十餘年卒

生員荆澍妻趙氏澍亡氏年十六歲志在必殉宗戚以公姑年老苦勸氏忍死撫姪元鉞爲嗣盡孝養三十餘年間里稱之

樊懋爵妻趙氏夫亡無子年二十父母舅姑憐其少欲嫁之泣謂曰天禍我家將焉適婦人不二天計

之稔矣執節終其身

臨晉有王氏者爲李孟冬妻其卒也百有十歲矣初歸孟冬二十五爲嫠婦秉志孀獨至於八十五年尤世所未有者雍正五年祀於節孝祠

張盛學妻樊氏二十二而夫死康熙三十年邑中大荒其叔因欲使改適樊毀其面且剪髮示無二志叔不敢逼苦節數十載而終

孫烈女生員孫永徽女字孟某于歸前五日孟卒女日夕飲泣誓不更適尋遭危疾語祖母曰兒夜遊

澗遇一柳二椿間憇焉閱月而卒孟葬請祔許之
墳正當一柳二椿間也

衛大垣妻馬氏年十六歸衛逾歲而夫亡撫遺腹子
宏獨居守志宏已十餘歲矣一日其母憐馬方少
且貧微以改適諷之馬涕泣曰向所以不死者以
此兒耳今母欲吾毀節我又何生爲遂自縊而死
與馬同時有姚氏者爲楊常順妻其寡時方十六
以小姪爲嗣歲餘姪忽自死其姑疑姚欲嫁致害
其子雖不言而意薄之姚知之不敢自明隱忍久

之忽破面截髮欲自殺以示無他志姑乃釋然復以他姪嗣焉馬之縊也雍正六年臨晉劉令爲立主於節孝祠而姚氏後亦表於有司

王宗陵妻衛氏合卺夕宗陵已病篤未三月宗陵卒姑憐其少欲爲改字氏斷髮示志孀居十四年而卒

故民周英妻荆氏十八而娶其隣有少婦新寡再適富家荆獨守其志後富家弟喪妻隣婦之適富人者素識荆母徐謂母不若以荆與婚荆聞之卽剪

髮自誓竟不能奪康熙中值大饑拾野蕨以食處之自若也

符氏者夫死二子並幼守志已數年族人鐘寬西忽浮言侮張謂符將謀招外人爲夫以養其子符聞之曰我爲嫠而使人作此言不死何以明吾志遂自經臨晉令擒寬西論其罪而符氏旌於官乾隆十七年也

陳烈婦者臨晉里民王有援妻也有援死無子而陳年方少悲哀欲自殺爲家人所持不得然事翁尤

孝乾隆戊辰大饑爲翁備甘食而已咽糠覈不使
翁知之後三年其叔既婚陳時呼叔婦囑以善事
翁若遺戒者一日語訖入戶自經鄉里聞之皆爲
流涕

許遷喬妻張氏

張鳳翔妻呂氏

高標妻張氏

上明代
並旌

生員荆璋璘妻姚氏

劉從寬妻姚氏

生員荆爾挺妻孟氏

舉人姚在朝妾焦氏

生員衛應先妻姚氏

生員張良魁妻王氏

制府
旌

張經典妻劉氏

學使旌

李垣妻張氏

生員孫鴻烈妻衛氏

杜尚德妻張氏

學使旌

許朴妻趙氏

王愜妻張氏

閻國法妻張氏

邑令旌

荆山英妻王氏

生員謝紹燕妻薛氏

謝顯相妻王氏

郭百知妻呂氏

衛季妻郭氏

生員曹元勛妻姚氏

上三人並有司旌

趙京妻段氏

衛祚妻王氏

壽九十餘

王萬成妻李氏

生員荆騰鶴妻趙氏

孫應端妻旬氏

姚五英妻吳氏

程秉讓妻衛氏

李岑妻王氏

呂俊聲妻周氏

荆王朝妻趙氏

生員張公祚妻姚氏

監生孫繩妻謝氏

溫所欽母陳氏

趙質妻謝氏

生員王載夏妻李氏

生員王旌任妻楊氏

儒童王追典妻鄭氏

儒童楊大燭妻韓氏

荆雲慶妻朱氏

趙昕妻謝氏昕子踵普

妻謝氏

生員王樞妻衛氏

趙自新妻樊氏

譚段氏 乾隆四年旌

黃剛妻鄧氏

乾隆五年旌

姚格妻王氏

乾隆八年旌

王信妻郝氏

乾隆九年旌

馬有才妻衛氏

乾隆十年旌

生員宋步旦妻吳氏妾宋氏

乾隆十二年旌

任廷琬妻王氏任天祥妻屈氏

乾隆十七年旌

儒童李夢棠妻趙氏

母世綿妻吳氏

李暉吉妻呂氏

樊純英妻王氏

李浙妻荆氏

生員李沐妻荆氏

吳方穀妻王氏

學使旌

荆毓光妻張氏

入節孝祠

生員衛邦傑母杜氏

荆中極妻賈氏

邑令劉入祠

生員李長年妻姚氏

任聖和妻楊氏

邑令旌

任廷珩妻姚氏

吳志高妻劉氏

樊爾士妻昝氏

李爾欽妻衛氏

許飛先妻郭氏

楊實妻王氏

李天适妻張氏

常寧妻荆氏

生員荆文欽妻王氏

謝梁氏

荆廸妻朱氏

儒童樊文鏗妻毋氏

王植妻楊氏

李茂朴妻閭氏

生員劉復元妻杜氏 周文奇妻郭氏

猗氏縣

明

令狐氏隱士景雲女夫喬雯病亡氏年二十二男世卿未及一週堅志守節家徒壁立日夜勤紡績至老端嚴外戶不窺孀居六十二年萬歷中建坊

杜江妻張氏年二十三喪夫時子方娠姻戚諷以改圖張毀面自誓緝緝執節事姑以孝聞撫遺腹子成立人無間言

孫周妻王氏年二十八而寡遺孤猶在襁褓或以微

言動之輒恚曰此言何至于我耳遂斷髮毀面足
不踰門卒全其節

令狐氏舉人楊聯芳妻少有至性從父鏜受列女傳
芳中鄉魁尋病療卒令狐方二十七止一孤女父
母勸之更志則痛哭曰令狐氏詩書禮義之族寧
容有再醮女且少時父所授詩傳謂何自是不抵
父舍絕葷茹素不御綺羅守節二十餘年卒知縣
管皦如教諭鄭溢扁其門

楊繼志繼妻張氏年二十九夫亡無子撫前妻子如

已出巨族欲娶者衆竟不能奪守節五十年

米萬厥妻董氏姑幾百歲失明夫亦瞽不能周養董
勤績紡博升合以給食冬寒負之逐日每先姑後
夫夜無衾抱其姑解衣相覆而寢數年如一日當
路旗其門

卞和王妻朱氏玉與楊生忤楊生動詬其父母玉忿
刺之死亦自經時朱年十九歲嘆曰夫能力誅讐
人以義自死妾何惜以身殉夫乎遂閉戶縊

庠生振奇女陸氏適安邑義民廉名揚甲申闖賊亂

陸同母劉氏逃難堡中至屯南突聞兵至亟竄避
野塚叢棘中俄賊搜之出以利誘相從不可遂脇
載馬上以行陸輒自投馬下罵不絕口遂伏刃

令狐氏崇禎初邑紳喬應甲有罪子拱秀偕妻令狐
氏被逮胥吏迫就道以手推令狐拂其小指令狐
毅然正色曰吾指乃爲賊吏所污耶此指無用矣
不可復留卽剪斷其指人咸憚其烈焉

國朝

郭邦幾妻裴氏年二十夫故子女亦相繼亡煢煢茹

苦四十餘年康熙初旌

郭琛妻荆氏產一子不育琛病革氏慟語母曰兒無姑何依無孤何撫願及其未瞑先死顧母恩未報請待來生母止之不得遂覓毒藥自吞腸斷指裂見者雨泣琛目之而逝事聞建坊旌表

生員荆文邵妻陳氏年二十四夫亡無子守節立孤撫如己出事孀姑二十餘年備極色養長女適郭琛十八歲吞藥殉夫人謂女烈由于母節

趙遵宋妻路氏年二十而寡或諷之改志路氏以刀

斷指自誓不二撫子龍章成立年七十卒

陳可濟妻任氏濟以歉歲餓死氏忍饑營葬畢慟哭於墓遂投井死

庠生郭爲翰妻荆氏十七歸翰甫逾歲翰隨世父任卒於越署櫬歸時氏在外家聞訃卽陰覓毒藥置襟袖間遄歸撫柩泣血和醋吞藥家人急救得甦然誓心殉死故食生冷物或曰一食未半年遂致疴瘠而卒

荆天福妻張氏年十七夫卒生子甫三月值歲饑翁

欲嫁之氏抱子哭曰餓死命也奈何再醮翁逃荒河南遺七旬祖姑氏紡績供菽水後數歲翁歸見老母康健孫已長成大喜已乃大慟曰我負孝婦矣攝縣事錢萬選表其閭

荆起端妻王氏夫亡一子一女衣食不給窮瘁萬狀不易其志其夫之弟將奪而嫁之氏聞之投井而死

史書妻裴氏史行醫糊口染疫而死惟遺一女氏父勸其他適氏正色曰從一而終義也進才潛受人

聘氏聞其謀寄女於史之友自縊而死

趙自清繼室閻氏年二十七夫亡子方一歲前女甫
十歲晝耕夜績撫子女成立前女適劉氏夫婦相
繼早死遺一女在抱氏育之爲擇配年六十七而
歿

黃益福妻張氏二十歲夫亡舅姑老病衆計蕭條氏
上事舅姑下撫二弱孤艱苦萬狀舅歿典其少子
以葬人稱節孝兩全

張洪鶴妻王氏鶴卒時子元順呱呱在抱葬未盈月

鶴之兄弟將奪而嫁之陰受人聘矣王察其有異
志夜抱其子潛投母家獲免時其母亦老孀又無
兄弟可依更值明季連歲饑饉屑草根木皮爲食
子長母卒始歸其家娶婦育孫艱辛備嘗壽九十
一而卒邑令吳旌其門

孟仕齊繼妻常氏年十五歸齊二十三而寡止生一
女誓不改操撫育前子恩勤備至孝事老姑終始
不懈遠近稱之

杜得福妻楊氏見侮強暴自縊而死事聞雍正五年

建坊旌表

令狐綱妻陳氏

有司旌

沈廷吉妻丁氏

御史表門

任宏妻張氏

庠生耿節妻楊氏

楊騰飛妻姚氏子仁妻孫氏

旌於官

史文德妻管氏

庠生衛道妻李氏

荆一德妻展氏

常元楨妻張氏

奉旨旌

庠生孫昌期妻陳氏

武舉令狐縉妻姚氏

孔學易妻郝氏

勅旌

孔氏義女雲姐

有司旌

何士俊妻王氏

上並明代者

令狐熠妻荆氏

有司旌

庠生張嘉猷妻潘氏子士祿妻薛氏

張永壽妻李氏

張仲鶴妻原氏

張士登妻解氏

荆世芳妻靳氏

張節妻王氏

學使旌

畢文禮妻令狐氏

王國信妻張氏

王公辛妻席氏

荆春陽妻管氏

楊廣妻荆氏

陸春林妻董氏

有司旌

管廉妻曹氏子婦趙氏

庠生荆佐鄢妻王氏

荆佐彭妻閻氏

張運福妻王氏

張璞輝妻雷氏

李喜中妻韓氏

質子
葬翁

張文華妻裴氏

暢恩秀妻王氏

潘成緒妻衛氏

庠生喬雲書妻陳氏

衛周慶妻陳氏

邑令
旌

王命名妻暢氏

孫培初妻鞏氏

邑令
旌

儒童劉文煊妻郭氏

張所性妻岐氏

庠生張中侯妻陳氏

孟仕晉妻陳氏

劉應翼妻楊氏

儒童楊敏妻荆氏

解河東妻趙氏

杜如密妻張氏

李全敬妻荆氏

衛元青妻曹氏

張士秀龍氏邑令旌

王智妻李氏智弟妻氏史

柔天福妻楊氏邑令旌孝婦

陳學業妻王氏邑令旌

王惕修妻邸氏邑令旌

曹啟倫妻王氏

馮養信妻陳氏

王克遜妻李氏有司旌

張延敬妻趙氏有司旌

孫淑禹妻胡氏

陳應明妻令狐氏

孫安楚妻何氏

杜繼秀妻紀氏邑令旌

王克弘妻胡氏

陳美發妻拓氏

郝進秀妻令狐氏

胡增福妻薛氏

程振法妻高氏邑令旌

程繼世妻王氏

郭春全妻許氏

衛得良妻何氏

荆作楨妻翟氏

吳曰增妻荆氏

生員荆周第繼妻董氏

孔建中妻陳氏

張天德妻許氏

荆昌壽妻邵氏

裴永林妻賈氏

劉彥禮妻楊氏

媳梁氏

任念伊妻樊氏

王天祐妻趙氏

生員陳呈琮妻李氏

生員周大經妻郭氏

楊祥妻高氏

原宗藩妻周氏

岳捷高妻劉氏

張璆妻梁氏

董帝畿妻介氏

李尚志妻王氏

喬希堯妻姚氏

梁經乾妻郭氏

師遊林妻陳氏

郭九緒妻雷氏

王象燦妻梁氏

李昌都妻黃氏

程之明妻王氏

裴建極妻李氏

裴開昌妻陳氏

陳侃妻趙氏陳矩妻

謝氏

閆廣居妻王氏

楊振江妻王氏

張大須妻翟氏

胡際祿妻張氏

王文會妻楊氏

王聚廷妻張氏

鄒宏友妻楊氏

崔自興妻耿氏

劉天福妻孫氏

儒童陸百揆妻梁氏

張崇武妻范氏

廉從新妻陸氏

景迎先妻賈氏

榮河縣

明

趙立妻張氏年二十餘夫故戚容垢面苦節四十一年弘治元年旌表

樊清妻吳氏年二十二夫亡事舅姑撫幼子孀居三十五年正德十一年旌表

生員馮信妻蔡氏年二十四夫亡子學甫六歲守節四十九年嘉靖十四年旌表

劉遵義妻田氏年十九夫亡誓不改嫁教子成立嘉

靖間旌表

武應舉妻盧氏莊靜有女德年二十夫歿矢殉父母
慰止之貧無所贍寄居母家紡績自給歷四十年
卒萬歷間旌表

蔡澄紀妻潘氏年十九夫亡生子甫一月矢志守節
歷年八十事聞旌表

張自立妻武氏年二十三夫亡父母欲改嫁之引刀
自決繪夫像敬事終身事聞建坊旌表

盧國治妻潘氏夫遭病數年侍奉不少怠比卒氏年

二十四比操金石享壽八十事聞旌表

生員郭九韶妻李氏年二十夫故矢節撫孤天啓四年旌表子俊彥預恩薦授通渭令氏封太孺人

郭建極妻孫氏年十七闖亂匿崖下穴中賊搜得之見氏有姿色引其手氏奮力脫臂投崖死

國朝

潘印昌妻周氏年十九夫亡無子撫姪守志當事旌其閭歲給粟帛

生員李盈院妻杜氏年二十夫亡氏擗踊號慟誓以

死殉潛縊柩前

生員丁繼美妾趙氏繼美年老無子娶氏生子甫三月繼美亡氏立志撫孤外侮叢集志不少挫

崔汝寬妾王氏年十九汝寬卒氏痛哭曰主之娶我也以無子我之不死也以有娠暨後生子呈嵐苦節撫孤卒綿夫祀

張五綱妻崔氏姜寇變潛匿高審賊入牽之氏不受辱投百尺崖而死時年二十歲

生員郭侯垣妻張氏年十六夫亡截髮自矢事後姑

以孝稱年七十餘卒乾隆三年旌

薛如蘭妻王氏二十五而寡家貧剪髮矢無二志或至再日不食不爲恨也乾隆四年旌

監生潘德涵妻聶氏二十二夫亡守志撫子善德及長爲娶趙氏已而善德夭趙始十九復爲未亡人姑婦相倚婺居聶氏常孝於其姑趙又能繼聶奉侍不離其側乾隆五年旌

王鐫妻尉氏十八而寡家貧子幼能孝奉其舅姑常力作以養志終不少變乾隆七年旌

生員范衛彥妻李氏十九夫亡其姑欲嫁之自折其齒以誓有烈女風乾隆七年旌是歲與李氏同旌者有潘河榮妻楊高正妻馮范回林妻陳陳與楊俱甚少其父母欲使改適皆誓不肯從與馮氏三人食貧自守以事舅姑生養死葬並出紡績之勤所累致者

王治民妻崔氏年十九守節治民事父母素孝其亡也父哭甚痛崔自誓終身以遂治民養親之志里人聞其行爲之感動乾隆八年旌

潘侶嵩妻李氏二十五夫死父欲奪其志刺面毀容以示不二忍寒餓以撫孤子乾隆十二年旌生員范雯妻于氏民竹大建妻蔡氏志行與李畧同又崔有年妻盧氏者二十而寡事姑極謹衣不整不敢見也其姑年九十餘盧能先意善承之是三人者皆旌於朝廷在乾隆十一年

武成起妻高氏娶時二十三耳執節甚固不以貧苦爲嫌勤勞績紡以長其子月所爲布成匹有數以之出市里人呼爲月布云母家在夏縣親死無子

清少府志 卷之十五
往奉其柩於滎河之鄉而葬焉其卒時八十有七
初宗族鄉人憫其苦節欲聞於官請表之高氏堅
不聽乃止

張氏武氏竹氏皆滎河人張夫柴宏寬武夫張崇竹
夫王若義並早死武氏爲後姑所逼欲令之去則
以死拒之張亦毀容矢節以謝舅姑值年饑紡績
供養夜無膏油以藁代之竹夫將死以貧不能存
語竹攜子他適竹甘忍餓卒不改也

生員聶雲翊妻李氏 吳承鼎妻馬氏

潘宗文妻王氏

范芬妻潘氏

樊養智妻陳氏

樊宏允妻白氏

生員張輝妻李氏

陸衍妻楊氏

生員潘毓麟繼妻郭氏生員丁夢弼妻茹氏

陳嘉謨妻韓氏

王宴妻陳氏

黃瓚妻謝氏

黃秉仁妻趙氏

陸進妻潘氏

潘逢浪妻武氏

郭維新妻茹氏

張自儉妻潘氏

薛自蘭妻王氏

王洪薦妻張氏

張廷珍妻蔡氏

樊焯妻聶氏

吳作聖妻樊氏

茹鳳棲妻趙氏

郭運周妻潘氏

郭翰畿妻王氏

王維棋妻閆氏

乾隆四年旌

武燕彩妻楊氏

乾隆五年旌

李久泰妻薛氏

乾隆六年旌

王庚戌妻趙氏

乾隆七年旌

冀梗妻王氏

乾隆八年旌

孫秉直妻竹氏

同八年旌

陳九有妻閆氏九有子建基妻王氏

乾隆九年旌

生員潘大擅妻武氏

乾隆十年旌

楊惟藩妻王氏

盧安仁妻郭氏

並乾隆十年旌

王炆妻張氏

乾隆十一年旌

黃君壽妻蔡氏

儒童武新政妻樊氏

上二人並
十一年旌

茹秉禮妻張氏

張多載薛氏

樊培洛妻郭氏

上三人並乾
隆十三年旌

儒童李仰妻高氏

薛惟藩妻郭氏

薛允盛妻王氏

郝連節妻王氏

生員吳作聖妻樊氏

李林妻王氏

萬泉縣

明

史氏適廩生楊喬喬死史方二十四姑憐其幼諭令
改嫁卽號痛晚閉門自縊姑覺救護得免三年未
嘗見齒奉姑甚孝後姑年九十二不能動履者三
年朝夕供奉飲食姑歿盡禮安葬後羣鶴繞於宅
鄉人以爲節孝所感事聞旌其門

董廷接之妻衛氏年十八守節子女俱無止依紡織
自營度日歷六十餘年有司嘉其節時存恤之

國朝

楊月蘭妻解氏嫁時年十八秉性貞淑動循禮法月
蘭有表姪董胎子者素往來其家以至親蓄之一
日月蘭外賈解氏獨居胎子乘夜往欲淫解氏解
持板奮擲之胎子奪板還擊解無完膚血漬牆屋
問解大呼不止胎子遂以刃斷其喉而遁隨獲胎
子誅之知縣鄭章表其瘞處曰節烈解氏之墓爲
文祭之

生員賈麟妻劉氏麟亡氏方一十九歲子女俱無爲

夫守節織紡度日後生臂疾家人請醫調理氏挺然曰寡婦之臂豈可令人見乎寧死無醫後年七十餘乃死

醫生張心誠繼妻李氏事誠繼母能恪執婦道艱辛備嘗誠有舅母王氏寡而亡子老無所歸李迎養二十七年如事翁姑終於我殯誠前妻杜氏遺子一甫三歲繼妻賈氏遺子一纔數月李一視撫育之並成立各安其業兄弟同爨三十餘年李八十七歲而歿

尉氏邑庠生延平之女年十三適山東濟陽縣令薛之彬子綿瑄甫二載瑄亡氏痛哭絕粒者三日過三月產一兒兒多病氏撫育辛苦備至姑失明氏侍奉孝敬異常父母憐其幼嫠欲奪志焉以死自誓孀居八載病卒

生員賈彭年妻董氏夫亡年少無子姑微言以試其志董嚙指斷髮誓不再醮及姑年老二姪俱幼事姑益加孝敬遇疾嘗試湯藥及殯哀毀盡禮撫育孤姪成勲維烈皆其撫焉

王長女父曰昌祉女年十四一日昌祉與妻他出女獨居室中里兒薛進喜往逼淫之女不從見殺進喜奔縣令瞿亮邦讞其獄莫知爲誰以憐家十二歲幼女言搜得血履襪於進喜家卒擒之伏罪長女得請卹建坊以表貞烈

趙賓周妻賈氏年二十一夫死子崇訓三歲崇簡甫七月姑以年少子嬰使鄰嫗試之氏截指數日絕食姑知志不可奪令人勉慰之始食艱辛備歷者四十餘年

董氏范繼正妻年二十七夫亡子殤孝事翁姑備嘗
艱苦歲荒粟貴束手無策適鄰女有市髮作髻者
氏自剪其髮易米二升作三次以供二人之膳自
拾青棗剥樹皮以糊口奉養二十年喪葬以禮士
民咸稱孝節

李五獻妻姚氏年十八守節孝事翁姑教子耕讀一
幼姪孤撫之若已出姪亡遺孫甫數歲時姚已老
仍扶持成立壽逾八旬精力強健康熙四十七年
知縣瞿亮邦給匾旌之

薛陵妻朱氏

孫青妻王氏

王尚志妻張氏

常告君妻張氏

生員薛應滂妻李氏

御史旌

賈勝妻張氏

庠生閻文妻王氏

劉仁妻孫氏

高應科妻李氏

上並明代者

王時遴妻張氏

杜茂新妻暢氏

生員薛國瑚妻李氏

屈愈昭妻吳氏

牛拱薇妻王氏

生員牛射斗妻張氏

李自新妻王氏

監生王穀躅妻薛氏

吳方亨妻賈氏

衛象充母張氏

孫光輝妻李氏

雍正元年旌

武生史宣妻王氏

吳克溫妻謝氏

虞鄉縣

國朝

樊世成妻靳氏年十七夫亡無子其家甚貧舅姑憐其少欲使之嫁靳秉志自矢早夜織作安于勞苦人或憫其節有所周者皆謝不肯受孀寡數十年邑令表之

張清妻陳氏夫死依於父其繼母使父強嫁之陳投井中爲救免遂奔歸翁姑十年不復歸寧以志節聞

劉雲瑞妻朱氏十九夫亡翁亦死與翁妾郝氏食貧
共操與朱宗康妻諸氏並以節孝爲鄉里褒嘉

生員曹鎔妻王氏年十八適曹越七年夫早世撫四
歲子讀書成名卒年六十有二生員曹昌辰妻李
氏年二十三昌辰故遺孤甫十月撫成列庠序又
先卒氏茶茹撫孫壽八十一而終雍正五年二氏
俱祀節孝祠

李月林妻姚氏年二十二夫故無子事孀姑三十餘
載姑年七十卒氏亦旋歿

薛建基妻張氏年十八歸薛二十二而寡子鍾秀甫
彌月守節七十一年九十有二卒

姚家寧繼妻邵氏年二十五夫故無出前子亦早折
有孫守志終始如一

王弘義繼妻張氏年十九夫故家貧無子女撫前子
振魁成立矢節終身

生員申燮妻張氏年十九夫故翁繼歿遺孤目雙瞽
氏誓死不二歲祔隣有孀婦將轉適氏慰留之賑
以粟米縣令旌其門

王貞女王業建女名栢英字羅村魏述基將嫁前夕述基死女哀慟絕飲食者三日請往弔父許之至則持服奉姑撫族子爲嗣邑令劉旌曰金石矢貞

王氏者蒲人王君習女也俗以女之待年未婚而先娶於家者爲童養女爲虞鄉楊君義所童養焉女至其家君義卽出商於外不知其音者二十餘年矣君義之父母疑其已死他所憐王欲嫁之王堅不聽願獨處以待君義且得養舅姑旣而舅歿凡

葬埋皆王所營復有過空房徐女者其行與王類
爲胡氏婦三十年而未見其夫斯其可哀也過空
房者其俗父母於子出未歸爲娶婦於家以待之
婦先獨處故謂之空房徐之夫曰胡映金不知所
之疑不復歸而徐已老矣既無所依倚撫其妹之
子爲子以是終身云

生員曹元勲妻姚氏 申士珍妻王氏

邵明超妻王氏 晁貴妻孫氏

張亮之妻左氏 麻世喬妻翟氏

樊世誠妻靳氏

賈澤妻劉氏

樊弘祚妻尚氏

進士尚翌岐妻鞏氏

楊櫛妻韓氏

張蘊樸妻劉氏

張自重妻尉氏

任德英妻劉氏

乾隆四年旌

烈女續

李氏永濟人甯孝妻孝貧爲傭自給他日孝病李外出刈草將以爲炊里人王氏者素凶豪見其獨在

欲強淫之李罵不從竟爲所殺乾隆十年旌

暢氏萬泉人王貴妻也貴死時暢年始十九誓不更

暢氏萬泉人王貴妻也貴死時暢年始十九誓不更

適業機織以事其翁姑一日有賊夜入室掠奪衣物且將逼暢暢大罵奪賊所持刀自刎幾殊流血被體賊驚置掠物於地而去

張氏萬泉人其夫高登雲死時張欲自縊以從爲家人救止遂盡截其髮居數年有子十二矣客或過其門而遺金焉子拾以告張張曰此屬富人金尚可設爲貧者則當如何使子待於外俟其人返尋焉舉還之

黃甲福萬泉人甲福死而其妻李少寡也其姑謂之

曰夫嫠而守貞者富易爲貧家難爲汝盍善自計
乎李堅不變曰願奉姑執節以終身矣姑後益老
病扶持捧掖之未常去左右甲福同縣楊廷蘭有
妻孫氏其節與行畧與李同有勸嫁者卽自剔其
髮面不沐衣不浣手拾薪汲井以養翁嫗歷勤苦
三十年

樊維垣妻溫氏

郭洲妻張氏

二人有司並旌

甯之茂妻孫氏

張敏行妻姚氏

丁檜妻田氏

有司旌

儒童張文義妻黃氏

生員薛紹先妻張氏 監生朱大和妻樊氏

楊瑞盛妻謝氏 高邑畢妻許氏

張恬妻孫氏 薛瑞妻党氏

李作棣妻張氏 楊扶策妻李氏

荆養貴妻馬氏 許名講妻趙氏

徐德滋妻殷氏 婁立極妻王氏

徐格妻王氏 丁脩妻王氏

張思濟妻李氏 庠生張鼎亨妻李氏

楊若械妻王氏 魏如緯妻黃氏

曹續彬妻衛氏

曹鐸妻閻氏

上永濟

監生荆以正妻龔氏

王亶禮妻何氏

王克己妻高氏

楊樹勛妻翟氏

謝子穀妻費氏

上臨晉

杜丕振妻郭氏

衛維璣妻李氏

管文瀾妻趙氏

陳萬妻喬氏

上並建坊旌

庠生張醒妻喬氏醒弟疇妻侯氏

喬聚德妻賈氏

王澤本妻羅氏

令狐在原妻喬氏

陸鎮妻令狐氏

喬于淮妻張氏喬于廉妻荆氏

李思忠妻喬氏

喬于淳妻楊氏

喬學忠妻楊氏

陸大全妻李氏

韓燕妻王氏

姚亮妻胡氏

王述曾妻雷氏

陳九式妻楊氏

孫薦鯉妻張氏

令狐明奇妻喬氏

令狐升公妻劉氏

令狐顧諱妻梁氏

李尚志妻王氏

令狐士珂妻閻氏

王恭敏妻荆氏

雷佩昭妻姚氏

雷知成妻曹氏

楊永禧妻荆氏

郭久續妻雷氏

南克俊妻王氏

閻恭先妻楊氏媳郭氏

何如朝妻岳氏

李文彬妻景氏

褚長民妻陳氏

梁經乾妻郭氏

令狐秉哲妻陳氏

上猗氏

聶夢麟妻薛氏

馮明耀妻王氏

上二人已旌

王宮璞妻張氏

王在坡妻姚氏

范承烈妻賈氏

張湓琳妻李氏

甯壽域妻王氏

薛養元妻史氏

王懽妻關氏

吳謹容妻董氏

范廷錫妻吳氏

范如金妻董氏

王者臣妻楊氏

吳珮妻薛氏

南自強妻孫氏

吳友之妻王氏

婁述祖妻張氏

王仰山妻董氏

李增讓妻尹氏

吳印泰妻馮氏

董發賢妻薛氏

喬棟妻馬氏

解帝召妻張氏

馮乙進妻解氏

董可儀妻楊氏

丁世俊妻王氏

馮廷柱妻牛氏

高起盛妻王氏

吳禪周妻董氏

李元福妻姚氏

李元德妻解氏

吳居端妻趙氏

解換臣妻張氏

張壁妻賈氏

王承爵妻賈氏

鄭望斗妻李氏

張大胤妻賈氏

張忠妻吳氏

董來鵬妻解氏

上萬泉

葉起波妻楊氏

王國寧妻胡氏

朱葉妻葉氏

苗維立妻馬氏

朱永吉妻王氏

樊若龍妻杜氏

晁龍妻李氏

申雲龍妻王氏

杜明珍妻吳氏

陳克瑞妻薛氏

鄭都妻樊氏

趙憲方妻張氏

申大鵬妻王氏

樊名揚妻王氏

王正賢妻喬氏

胡允德妻高氏

陳德友妻薛氏

邸雲朋妻王氏

上虞鄉

予述郡史自明世訖於今茲其以嫠寡表狀者多
不可紀數而士行特聞絕少何哉夫梨莊衛姜世

貴德素然風俗既敝人多獵心或至幽貞翳耀於
仄微名義飾資於華富旌彰斯褻勸激無所而道
幾盡嗚呼獨此爲然哉予蓋觀乎世之祀於鄉與
祭於官者往往猶是而重太息焉若所叙諸夫人
或有掄刀截指刻面誓心甘飲刃以勿污樂沉淵
以表潔至乃相從地下無緩死於須臾含戚終身
託哀歌於早寡斯則更生之傳湘東之書又曷可
已哉爲條著行事卓鑠者其餘姓氏并以附於篇



